

KIMWIIRIHE EXEENI YESU

YOOWO ONIIHANIWA KRISTU?

 Apwiya yooreeriheni, Munna Vayle. Mooxeleliwa, apatthani. Kweekwe kinooxeleliwa. Billy aakileela wira kaahikhalana, voosiis'ula, ntoko mivaanelo miloko miraru s'omeekha, ni koocalela miili sa seiyo, tivo, kookupali wira miili wala miraru. Tivo miyo nkikhanle waaphiyeryaka athu othene, moosuwela, ni athu alipelelaka, ni anlipelela mulistani miyeeri ni miyeeri. Ni Apwiya anniira ithu suulupale mme. Oh, Awo—Awo ti Muluku ahu. Kahi siiso?

² Vano miyo kookupali, voosiis'ula, wira hiyo othene noosuwela mixankiho suulupale sikhumelenle elapo ela, sa opweteiwa Mukhulupale ahu, Mwenye Kennedy. Kinaamwi kahaamweemererya mulopwan'owo mwa ipoliitika sawe ni mwa etiini awe, masi nnakhala vo owo khaaphwanela okhwa siiso. Nnari. Ni aahiyaka anamwane ale siiso, ni oohikhalana tiithi. Ni maama okhanle... Muhano Kennedy, kinaamwi tthiri kahiiraana ni yoowo, ni inamuna sawe ni ithu, khino, masi, muupuwele, owo maama. Owo onoomala-ru ompweteya an'awe, ni oopweteiwa aiy'awe. Nto awo yaamorenle ottuli wawe, ni ephome ya aiy'awe yaayehereye ottuli wawe. Eyo ti yootakhala.

³ Mootoko wuupuwela... Imaara sikina hiyo ninuupuwela wira owo onnikhaliha ettharihelo sa elapo, mihapo n'ithu. Eyo pooti okhala siiso, nave. Masi mwaahisuwela wira, Muhano Kennedy khonatoko wiiwa mmosa wa Mitthaka iya kinlaleyaaka sa yeeyo? Khino owo iiwale-ru mmosa wa Mitthaka iyo, khino aamwiira voovirikana. Ni amosa-amosa w'axinn'ihu athiyana anniwa, nave nlelo khandtharihela yeeyo. Munnona? Munnona? Munnona? Owo oleliwe muKatolika; ti yeeyo tu onsuwelaawe. Hat'etthu ya nthowa ni yeeyo, moone. Owo... Eyo eyeettiheryo. Hat'etthu ya nthowa n'atthu, atthu aKatolika. Eyo eyeettiheryo, eyeettiheryo y'Ekatolika, siiso ntoko Prespiteriyaano, Metotista, wala khula emosa wa seiyo, moone, wala aPentekosite, khula emosa wa seiyo. Ti eyeettiheryo, kahi athu.

⁴ Mwenye Kennedy, miyo kinoona wira, oovara mu—muteko wooreera wo okhala Mukhulupale. Murim'aka onniwoonela othunku amwaar'awe. Ni kiri oowiiniwa murima mwaha wa yeeyo, ni hata elapo ahu yaamukhala, atakhali ni sikina mulaponi mwahu, wira etthu siiso.

⁵ Vakhala wira munniwerya ohiiraana ni mutthu, vooreerela, ni othhara eneemereryanyu; kahi mwaha wo omwiivela mutthu mukina, mwaha wa ithu siiso paahi. Ni axinamwane ale

annisuwela, iirale, mwanamwane mmosa iirale, “Vano nkirina-tho mutthu wira othweeleke ni miyo. Apaapa khakhanle.” Munnona?

Tivo miyo kweekwe kinnuupuwelaka wira owo waarowa okhala mukhalelo aka, nihiku nlo. Yaahihalela wiiraneya imaara sinci-ene, ntoko sinsuwelanyu, wo woopeliwa ilapo sikina; okathi waarinaaya okikhupaarelaka ni irutthu saya, wira ekaakiherye woopeliwa, voorakamela.

⁶ Tivo mutthu akhwa siiso... Masi, eyo e—ehisapo elinvwe, enrowa ni ovuwa wa itthu soohiyana-hiyana. Munnona? Kinoona wira nirina nuusu ntoko khula Mukhulupale aneexexe, mmosa eriyari ya axexe, onimwiwiwa, ni kinniisoona oosikula saana mwaha wa yeeyo. Ti yoowuuliha muru hiyo okhalana mutthu siiso wAmerika, aarowa wira etthu siiso.

⁷ Nto vano, nnya, ntoko sihimmye aka, miyo—miyo nkiiraana ni ipoliitika sawe. Miyo ka... Miyo nki, nkiiraana ni miyuupuwelo sawe sa etthu owo aaphavelawe wira. Masi, moone, owo mutthu mukina. Ni nkiiraana ni enamuna awe ya etiini. Miyo—miyo vekeekhai nkiiraana ni yeeyo. Masi, nnakhala vo, owo—owo aaleliwe siiso. Owo—owo ti mwaha ene. Ntoko sihimmye aka, khino owo iiwale-ru etthu yoovirikana, khino yaamukhala yoovirikana.

⁸ Hiyo nihaana e—etthu emosa niniiraahu va, wira mmosa w’atthu ahu akhwa vale, wala etthu siiso, hata akhalaka a ota... Miyo kinoona wira ntoko e—ntoko ekereja ya wAmerika, ntoko erutthu y’atthu a wAmerika...

Atthu a wAmerika yaamuthanlale Mwenye Kennedy wira akhale Mukhulupale. Vano eyo yaari... Mwaha wa yeeyo hiyo nikhanle ahu etemokrasiiya. Miyo nkaamuthanlale Mwenye Kennedy. Kaamuthanlale Mwenye Nixon, okhala wira kaanimusuwela Mwenye Nixon, mmansaka. Ni miyo—miyo aanikisivela, nto miyo—nto miyo kaamuthanlale yoowo, mmansaka, okhala wira aanikisivela. Masi atthu a elapo ela, atthu a wAmerika, anammuttettheni akhwaaka a elapo yeela, yaamuthanlale Mwenye Kennedy. Ni enamuna awo yiirale aya, ahe, eyo ti yawaya awo ni Muluku, masi ti yothene eyo.

⁹ Masi kinoona wira, mwaha wa maama ola, mutthu, maama orina anamwane, Muhano Kennedy, khinaakhanle weemelaka okathi vakhani paahi wira ninvekelele?

¹⁰ Pwiya Yesu, hiyo atthu, hiyo nookhalana moonelo mmosa ni mukhwaawe. Ni ninnoona othunku, Pwiya, Mukhulupale ahu orimoopeliwa enamuna soopeliwawe, wiwiwa voohoova. Ni ninnikhupanyerya wira elapo ahu yoophiyerya mukhalelo ola, wira atthu siiso aakhala—aakhala mulaponi mwahu, yaarowa omwiiva mutthu voohoova; ntoko simwiivale aya munna ole ooriipa woohikhala khalayi, ni orimoopeliwa voohoova, mwaha wo othanyana wa nikhuli. Ni hiyo ninnoona othunku wira

atthu siiso aakhala eriyari ahu, Pwiya. Hiyo, ohilipalipa wahu, wooruuhela yeela.

¹¹ Ni hiyo nininvekelela Muhano Kennedy, mwaara a yoola, Mukhulupale. Ni noosuwela wira axikhaani ale yaawehaka awaya—atithi aya, yaahiyanse mahiku vakhani ehinatthi yeeyo, mulopwana ootteeliwa murima, aathweelaka ni aaphirikeyaka ni yaawo vathi. Vano awo kharina tiithi. Ni wa muthiyan'owo o...amwaar'awe, aiya'awe yaammorenle ottuli wawe, ni ephome aya khuyeeheya vavestituni vawe; omalaka-ru omusikha mwan'we.

¹² Nave nlelo, Pwiya, khino naaminiki wira muthiyana onnivonya, ya—e—enamuna owo ohenle awe ettharihelo mulaponi, wa ewarelo awe ni siiso; masi eyo—eyo pooti okhala w'atthu a wAmerika, mwa yothene, awo, ti yeeyo awo anthunaaya. Vano hiyo—hiyo nininvekelela yoowo, voosiis'ula, wira Nyuwo mmukhaliherye. Ni wira okhale okathi mwa oriiipiwa murima nno voviixerya owo omphwanyaaawe ele ekhanle Ekeekhai, Yesu Kristu! Munvahe, Pwiya, Ole onwerya paahi ovaha murettele ni okurunuxa murima okathi w'oxanka.

¹³ Ni munikhaliherye, Pwiya, wira nitthikeleke okhala ni murima ahu wothene, muthuko woowaarya, okhala wira khanisuwene okathi xeeni wala ovara murima xeeni ninkhalihaha mwa mutthu mukina. Munitthuniherye naaryihe Muthuko wa Kristu mpakha Owo orwa. Vano Makampuusi Muulupale a nikoto, Ole onsuwela exariya yothene, onooruua itampi sothene otthuvula, ni Owo onosuwela oratta-ene moota wo wira. Nto mpakha okathi yoowo, hiyo ninniivahererya mmatatani Mwanyu, wa ophenta Wanyu ni onimorela ikharari. Mwa Nsina na Yesu. Amen.

¹⁴ Ayo, kinoona wira khaavo omphwanela okhwa siiso. Vano, Mwenye Lincoln khaaphwanela okhwa siisaale. Mwenye McKinley khaaphwanela okhwa siisaale. Huey Long khaaphwanela okhwa siisaale; khaavo hata mmosa w'atthu awo. Miyo nkinaamini eyo. Wiivanana, eyo ti yootakhala. Amiravo ahu khawanne ilapo s'okhplea wu mwaha wa etthu siiso. Epantera ahu khevenxiwe mwaha w'etthu siiso. Hiyo khamihiyo anammuttettheni a wAmerika wa etthu siiso. Nnari. Enamwi, elapo ahu ekhanle yoohononeya ni yoovirikanyiwa ni etampi, ti yeeyo—ti yeeyo eniriha itthu iya. Eyo etampii.

¹⁵ Vano, olelo nihaana...kinrowa wiixuttiha exikola ya Ttiminku, ni itthu kamosa-kamosa kaatthunaaka ohimeerya ekereja. Nto eyo ti, etthu yoopacerya, kaatthuna wira nyuwo mukilevelele mwaha wo woopisihani okathi munci-ene Ttiminku voosiisu kakhalana Mitthaka iya. Vano nto Apwiya yatthuna vale...Etthu kiniirelaaka yeela, okhala wira miyo—miyo kiri va eriyari y'atthu aka ni miyo—miyo kinniixuttiha miixuttiho voolipa saana ntoko sinsuwelaaka.

Nkiniixuttiha miixuttiho iya mapuro makina. Kinikhala paahi mmi—mmilipiheryoni soothuneyaxa sa Ehaperi yoooreera. Masi miixuttiho iya sikhanye soolipa, miyo—miyo nkiniwiixuttiha ota ma—mapuro makina. Vano nto, va, enkikuxa ewoora emosa, imaara sikina, iwoora piili wala tthaaru, wira kimalihe Mutthaka aka. Ni kinnoopisihani va imaara sikina, mpakha ewoora yanamuloko ni piili ni minuutu miloko miraru, ewoora emosa ya makaaripi. Ni eyo vakhani paahi wa moota kiirakaaka. Kaanilahelaka, okhala ohiyu wotheene, imaara sikina. Kinnikhalaka, ninnipaceryaka, imaara sinci-ene, iwoora thanu na tthaaru n'urowa owaani voosiisu aya iwoora piili wala tthaaru, ti yeeyo, okhuma mmithukumanoni.

¹⁶ Masi miyo—miyo—miyo kinrowa weeherya, karwaa—ru eriyari anyu emaara ekina, ni paahi e—ekhaani... mutthaka ohiya wiixuttiha wunci-ene wa yeela, voohikhala wira kinimooleelani khalayi ene wira enrowa okhala etthu, okhala wira, kookhalana Malope Mathanu na Maili, kinaamini aka, wira anootharelana, anthukana oratta-ene ni Ekanyeryo ya Neethanu na mosa. Okathi Ekanyeryo ya Neethanu na mosa erumme aya, Malope othene Mathanu na maili yaahiruma emaara emosa, moone. Ni siiso hiyo... Kaatthuna kiruuhele yeeyo Ekereja Owo ohinatthi Orwa, vakhala wira... wala orowa waka, wala enakhaleru etthu p'itthu, kawerya vale.

¹⁷ Vano, naira siiso, nto nnimooleelani khalayi ene. Ni khino nto, noonaka voosiis'ula, munvireloni osareiwa, ni ixiri, ni mapuro othene, ninoophavela... Nihaana opuro vano khino nikhanlyahu ophwanyaka nno. Ankilaathi atthu oophiyaka ikonto tthaaru, ni awutitooriyu ooreera a exikola osulu wenno nno. Nto Malope Mathanu na maili, ninrowa ophavela olaleerya weiwe exikola yeeyo. Ni eyo enoovaha opuro munci-ene w'okilaathi, moone, wira niwerye owaakhela atthu.

¹⁸ Nintthuna nihimye, wira oNova Yorke, ninoomaluru oviriha okathi wooreera. Awutitooriyu Morris iwe, naahaana waahiya atthu, khula ohiyu. Khiyaareere atthu mpaani. Mooro... Mulopwana aari mwaneene nipuro... Kapitawu a anamattipiha mooro aamutthuka empa naahin'ye—ru weemela, ophunyana siiso. Vano nto naahaana waahiya orowa. Ni atthu vate mphironi, yeetasaka nno ni nno mphironi, avekelaka wira mutthu akhulumuwe ni avenye akhume, wira awerye ovolowa aphwanye opuro. Munnona? Mutthu mmosa paahi, awo yaamulipelela vate vale mutthu mmosa paahi, wira avolowe. Nto ootharelana aamulipelela vamukhora, vano nto awo yaammuhiya mmosa ovolowa siiso. Mutthu avenyaru khukhuma, aahaana orowa owaani voohipisa, ahe, mutthu owo aanvolowa ni okawanya epantte eyo. Moone, awo yaanvolowa. Ti yoooreera saana, nikhuru nooreera n'atthu. Ni kinnaamini wira olumwenku, ekereja y'eKristu, ti yoovoliwa etala ya Muluku.

¹⁹ Vano miyo ki—miyo ki—miyo kinroromela wira...

Koosukhuru, munna. ki—kinroromela wira—wira Muluku onoonivaha okathi ula, vaavo vakhanle ahu othukumanaka n'ukhalana Malope awo Mathanu na maili ookiserya. Wira musuwele, okisivela weettiheriwa wira itthu iyo.

²⁰ Vano woolyaani wa voosiisu w'Alipa a Nakoso... Voolimaleleya, ekapiitulu aya iwe, kinoona wira awo ahimbye wira yaahikhalana oophiyaka okhuma miloko mithanu mpakha emiya emosa woolyani waya wa voosiisu. Ni voosiisu ole yaahitumiha ittikitti ekonto emosa ni imiya thanu na piili, ni khwaatthuniherya okela akina, wira nisareiwe nipuro voomalela. Ni khula nvirelo, ni mmaxirini, ni mmaxikattani mothene, yaahikhala atthu yeemenle. Ni arumeyi amosa-amosa oosuwanyeyaxa, anamukuttho amosa-amosa, ni—ni siiso, yaari weiwe wira yiiwe Mutthaka. Ni siiso, ntoko vansuwelaaka, kookupali wira eyo yaahikhaliherya etthu. Khino ehiira etthu—etthu ekina, yooreera ovikana ele hiyo tthiri naarowahu wuupuwela wira yaamukhala.

²¹ Vano, nto, olelo ohiyu e...Ninrowa okhalana mu... Mutthaka olelo ohiyu, Apwiya yatthuna vale, mwaha wa—mwaha wa—wa moota, wa mukhalelo anyu ni Kristu. Ni vano eyo...Owo onrowa okhala wookhweya. Ninthuna nipacerye, kintthuna kikhale vaplataforma ewoora yaneethanu n'eili ni minuutu miloko miraru. Vakhala wira...Okathi xeeni voolimaleleya mumpaceryanyu, ewoora yaneethanu n'eili ni minuutu miloko miraru? [Munna mmosa oniira, "Hiyo nimpaceryaka ewoora yaneethanu n'eili ni minuutu miloko miraru, masi ninrowa opacerya ewoora yaneethanu n'eili."—Mol.] Oh, yaneethanu n'eili, nto kinookhala vaplataforma ewoora ya neethanu na n'eili ni minuutu miloko miraru, nto siiso kaahaana omaliha ewoora ya neethanu neeraru ni minuutu miloko miraru, Apwiya yatthuna vale, okhala wira miyo—miyo...Kinrowa okhala oowaakuvaxa vanweryaaka, ni kinrowa opacerya olamalela.

²² Nto etthu ekina, ti, khino aakhala aletto anwiiwa atthu atheyaka. Okhala wira, kinoophavela okhuma va, masi nkinwerya wira. Eri ntoko...Kinroromela wira kheniiweya ntoko oveeha, masi ame aka yaanihimyaka, wira atthu yathukumana siiso, eri ntoko malaaso a meele voosiisu wooriirya. Moosuwela, t'otikana, ni aniyeheya vakhani-vakhani. Ni eri ntoko siiso. Miyo kineetta vakhani-vakhani Mmitthakani iya, okhala wira o—osiva wa muhali wa Muluku, moosuwela, moota oniraanihaya ni onikhalihaya ootikana. Ni miyo—miyo—miyo nki, nkaarowa otthuna enamuna ekina. Miyo—miyo kintthuna siiso paahi. Vaavo, kinnuupuwela wira naanivenyaka ni wiipa nsipo nle:

Noottottopeliwa nikhale nlutte nintthuka
Mirima sahu mophentani w'oKristu;
Opatthana wahu wa muupuwelo mmosa

Ori ntoko ole Osulu. (Munnona?)

Naavalaanaka,
Eyo enniniwereiha muhina;
Masi nlelo nnookhala vamosa mmurimani,
Ni niwehereryaka okumana-tho.

²³ Ni miyo—miyo kinroromela wira eyo kweekwe ekhale e—etthunelo ahu va. Anci-ene wa masantu awo a khalayi aarupa okhuma okathi yoowo, masi hiyo nlelo nri oowiiraana mmurimani. Ni kinoona wira yoowoona ele voosis'ule, owoona epantte ile iwe, ni ottotopeliwa ni ovuwa wa mukhalelo w'emiravo wa alopwana ni athiyana, nlelo wamulikana, ni okathi awo yaaryaya mulaponi mu. Miyo kookupali wira awo anlipelela ophiya wahu. Nihiku nlo ninootakanxana ni yaawo, Muluku atthuna vale. Vano miyo—miyo...

²⁴ Ni muupuwele miteko s'okokhorela, muteko wa masipo onrowa opacerya iwoora thanu na piili ohiy'ula, ohiya thanu na piili ni minuutu miloko miraru.

Vano nto, esumana enrwa, kinrowa okhala oShreveport, Louisiana, nto weiwo oTapernakulu Ekumi oShreveport, Louisiana. Ni kinoona wira awo amphavela omphwanya awutitooriyu ohoolo. Munna Moore aahilikari nsana ohiyu, khwira awo...Owo muthukumano wa khula mwaakha, ni anwehererya muttitthi muulupale w'atthu.

²⁵ Kintthuna kihimye onamoona mwaamukhaani okathi vakhani kihinatthi osoma Soolempwa. Mu—muhano mmosa aakilaanthe vaava nihiku nlo, yaahikhala...Kinimooleelani ele ekhanle ovara murima wa mutthu oninvekelela mukina. Khwiiraneya miyo oweha nto kimoona muhano mukina miyo paahi...Margie Cox, mwaara a Munna Rodney Cox okilaanthe va. Nto esumana evinre, kookupali wira yaari yeeyo, okathi waaryahu vaava, erooho Yoowaarya yaalamula sa mmurimani mpaani mu, moosuwela, moota anleeliwaaya atthu. Ni owo aakilaanthe...Owo okilaanthe vaava naanaano va. Masi owo aari ottaiwene iwe nipuro nlo. Nto miyo—miyo khuweha, nto aahikhala muhano mmosa a—aatthaniwe, aarina tiyapeeti. Ni Margie aari...Nto mwa yoowoona aari Margie. Ni Margie eemenle vale; ni nnakhala vo miyo kiweha iwe, kimoona, nto yaari e...Nto miyo kuupuwela...Nto miyo kiweha wira kimoone muthiyan'ola mukina, ni Margie aari mwa yoowoona, masi Waarya waari vasulu va muthiyana. Vano miyo—miyo kikhala kiwehaka.

²⁶ Nto miyo kuupuwela, "Ahe, kamwiitthana-ru Margie, awo animwiira, 'Vekeekhai, eyo, vekeekhai.' Mutthu onaasuwela, onimwiira, 'Vano, owo—owo, a—aiya awe mmosa wa axi—axipatthani awe a vatthirima, awo ankhala vamosa, anrupa vamosa, anxaya vamosa, ni—ni sothene, tthiri, eyo ti, owo aamusuwela eyo.'" Masi Margie khaasuwela eyo. Masi

kimwiiithana muhano mukina, yoowo aari...kookupali, aari munna mmosa muthiyana a oChicago, ntoko kaasuwenle aka ohoolo waya.

²⁷ Masi nto khwiireya, wira mwa yawawe...ekaafirika, saapakiwa imwaleyo sa tiyapeeti. Ni—ni owo aarina tiyapeeti. Ni siiso owo aari mphironi, nsuri, aarowa oklinika mwaha wa yeeyo. Ni—ni siiso okathi ohimbye awe, vano miyo kimulopola ela. Nto miyo khwira, “Murwe va, Munna Margie.” Ni kimuleela sa moota owo aakhalanaawe nantiirya mmatatani, ni—ni ewereyelo eyo.

Mwaamuthiyana onvara muteko othana n’uhiyu, ohalela, osulu iwe, wa...maama mwaamukhaani oororomeleya, wira aakhaliherye aiy’awe oliva empa aya awo amphavelasaya oteka. Ni—ni owo ni muhima awe, Nellie, ni Charlie, ole ti munn’awe Rodney, amwar’awe, ni othene aya avaraka muteko vamosa mukaafirika iye iwe, vowiilipiha ntoko sinweryaya. Ni ovilela oveehiwa, awo aroohiya maihi aya wunnuwa, ni aroohiyasa wiisoottiha ithu wiitho, ithu siiso, vakhalanse aya aKristu. Miyo kinnaamini ovaha nttittimiho nipuro nttittimiho vamphwanelaya. Ni vekeekhai kihaana nttittimiho mmurimani mwaka mwaha wa aximwali awo aili.

²⁸ Vano nto kaahinvara ntata khunvekelela. Vano owo khurowa iwe, ni awo khiyaawenrye ophwanya eneneeryo ya tiyapeeti hata nipuro. Siiso, owo oorowa.

Muhano mmosa aakilaanthe vaava nipuro nlo, aaitthaniwe, ni aari munna mmosa muthiyana oniihaniwa Bruce. Nkimmoona voosis’ula, masi owo kweekwe aari...Owo muthiyana mmosa oowerya ovekela. Nto muthiyan’ola aaroovolowa, waari okathi wookiserya kaaryaaka wenna, ni khi—khisaaikaiwe ittikitti sa mavekelo, nnakhala etthu, tivo khaarowa okhala-wo hata mutthu, hata eliinya ya mavekelo, tivo awo paahi...Erooho Yoowaarya yaarimwiiithana vamuthukumanoni.

²⁹ Nto Mwamuthiyan’ola Bruce, owo aahi—aahivonihiwa emaara emosa, yoowo ene, kankuru. Ni owo—ni owo kweekwe onnikhalana muritti vamurimani vawe mwaha wa mutthu mukina, nto owo aanvekela paahi. Ni aahikhala muhano mmosa a oLouisville, aamookhwa, kankuru vammilo. Ni okathi waalompawe, Erooho Yoowaarya khurowa omulukama muthiyan’owo, khumwiihana, ni sothene Eyo yiiralyaya, khimuleela ole aaryaawe, aahimuhimeerya wira, kiireke, aari pani, ni ole waari mukattyamiho awe, ni sa owo okhalana kankuru, ni khimuleela wira, sothene saamukhala saana. Nto mwaamuthiyana owo khurowa owaani.

Mahiku maili nuumala yeeyo, owo khupacerya ohalela okhwa, mwaha wo ottiyeya iphumu, mmilo awe waarimwiipa saana. Owo khukothomola vancipale, nto kankuru khukhuma. Nto owo ori saana. Munnona?

³⁰ Exeeni yiiraneeye, moone, muuwe, mmansaya, etthu yootakhala erina ekumi mwa yeeyo. Munnona? *Kankuru*, onrwa mwa nu—nuulumo, nuulumo na mameetiku, na “ekhala,” nnihimya wira khoreerane metto, ntoko e—ekhala emphwanyiya opahari ni—ni enoonuulani ephome. Ni muuwe ola wootakhala vammilo vawe, yaari yeeyo niiraaya.

Vano, moone, miyo nkinwana ni muuwe. Kinwana n’ekumi eri mmuuweni. Munnona? Ekumi eri mmuuweni ninwananaahu. Munnona? “Mwa Nsina Naka anoowoomola axetwani.” Nuulumo *xetwani* ti “namahooxa,” ntoko a erutthu. Nto ola aari xetwani. Nto siiso ekumi vakhumme aya mmuuweni, vekeekhai, eyo yaahiiriha muuwe opacerya wiipa.

³¹ Siiso ntoko mwalapwa mwaamukhaani omphitiwa muramphani, etthu siiso, mmuhiye akhale vaavale vansuwani mahiku vakhani, nto, nto onimunnuwa vaara vaili.

Ahe, ti yeeyo yaamwiiriha mwaamuthiyana okhala ootepa. Imaara sinci-ene miyo kooleeliherya. Mwaatepaka, eyo ethoonyeryo ene wira moovona, moone. Nto siiso yaamutepa okathi wothene, ni omuhaaxaka, okhala wira waamwiipa. Ni e... Masi eyo waahihiyana, ekumi yaari ota wa yeeyo. Ni owo akothomolaka siisaale, moone, [Munna Branham onokothomola—Mol.] *siisaale*, khusukhuma, khusukhumeya veerutthuni vothene. Nto etthu yookhwa, erutthu paahi ehirina ekumi mwa yeeyo, kankuru aahikhuma, khutupha, moone, khumorela ota.

³² Tivo, yaari yeeyo, erutthu yaahikhuma nto. Owo khaari xetwani aakhumme. Eyo yaari empa owo aakhalaawe-mo. Owo aarookhuma mwaha wo waamini wa muthiyana wa etthu aaleeliwawe, asuwelaka wira Yesu Kristu mmosaru nsana, olelo, ni mahiku othene, ti yeeyo yaamwiivale kankuru, khumukumiha ekumi.

Vano, khino siiso owo aatthikenle wa tothoro, nto tothoro khwira, “Ethiru, e—e—etthu ene eri vaavale ntoko kweekwe enkhalaaya.” Masi eyo yaari yoolikana, muuwe waari vaavale, masi kahi ekumi, khiyaakhanle vaavale. Munnona?

³³ Vano, ankhi waakhanle nipuro nimosa wahaakhanle aya—okhumaka-vo?

Eyo ti elatarato? [Munna Neville onimuhimeerya Munna Branham, “Eyo elatarato ya muuwe ekhumme mwa Muhano Baker, a oSpringville, Indiana. Ni owo... Ela elatarato yootaphuwa, owo aavinre awe, nuumala ovekeleliwa.”—Mol.] Va eri elatarato ya muuwe wa Muhano Baker, a oSpringfield, Indiana, yaakhumme, nuumala ovekeleliwa. Eyo elatarato aya. Moone, eyo erutthu xetwani aakhalaawe-mo.

Siiso ntoko nyuwo munkhalaanyu mw’erutthuni mu munkhalaanyu-mo; pooti okhala ekhaani, yuulupale, yooxeerya maihi, yooriipa maihi, etthu p’itthu. Munnona? Ti xetwani

onkhala mw'erutthuni mu, ahiiso Kristu onkhala mw'erutthuni mmo. Ahe, nto ekumi yakhuma-ru mwa yeeyo, erutthu anyu nlelo eri elapo ela ya vathi, moone, masi ekumi khekhanle mmo.

Okathi ekumi ekhummye aya, erutthu nlelo yaari vaavale. Vano nto eyo yaahithomowa mw'erutthuni mwawe ni khoomoliwa, erutthu yaahikhuma.

Masi yakhala-ru nipuro ehikhanle aya okhumaka, vano murima anyu ohaana okuxa etthu iyo yookhwa n'ureeriha ephome, khula okathi owo ommanaaya. Eyo ennitannya ehooma, ni itthu sothene sikina, okhala wira iwo oropa. Munnona? Ni murima anyu ohaana o...Kinoona wira murima onreeriha ephome okathi enviraaya. Eyo ekeekhaii, Munna Dauch muthiyana? Kinoona wira ekeekhaii. Murima, okathi ommanaaya, onooreeriha. Nfurumeera, moosuwela, ni mukina okilaanthe va ohoolo wawe. Ore...onkuxa e...Nto ti yeeyo entannya ehooma mwaha wo oropa. Enkuxa oropa ni—ni otannya ehooma.

³⁴ Vano, atthu, moone, ti waamini wanyu. Kuhiyo moonelo anyu. Eyo kehiyo etthu, yakhala siiso, ntata naka naahikhale noowookowa. Eyo kherina naata ni mwaha owo. Ti waamini waka oniira yeeyo. Munnona? Ohoolo wahu wene, ninnoona elatarato ya mutthu oovonihiwa voomalela, mwaha wo waamini. Vano nto nnimweetta paahi nivalo nnivalo mpakha nikele mwa mutthu owo, ni ninimweetta paahi ni yeeyo. Munnona? Eyo eri vo. Ni eyo, ti yeeyo eniiriha, waamini wanyu; kahi miyoonelo sanyu. Waamini wanyu onniira. Oxukhuru ni nttotopelo sikhale wa Muluku!

³⁵ Vano okathi vakhani paahi wa mavekelo, ni nihaana mwaha va ninthunaahu wuupuwelela, ni okathi vakhani Apwiya anrowaaya ovara muteko ni hiyo voolikana ni yeela.

Nto, vano, vano nto yakhala a nyuwo murina orowa voosiis'ula, ni muhinrowa okhala vamutekoni w'okokhorela w'ohiyu, Apwiya yathuna vale, ki—kinthuna kikhale-tho vaava. Amusi anoorwa athikaka esumana ya Natale. Vano nto, Ettiminku nuumala Natale, Apwiya yathuna vale, kinthuna kilaleye Mutthaka aka wa Natale vaava otapernakulu; Ttiminku nuuvira Natale. Apwiya yathuna vale, yoosoma enrowa okhala, *Namweettasa Mphironi*.

Tivo nrowe nuurame muru ahu vano nivahererye nivekelo nihinatthi osoma yoosoma.

³⁶ Pwiya Yesu, Nyuwo mukhale vakhiviru ni hiyo okathi ene yoola. Ni noosuwela wira ti yoolipa mukereja mwahu yaamukhaani, ni anci-ene aryeene ooweemela. Ni—ni hiyo nri va kahi mwaha wa ekhalelo saana ya nipuro, ninnivaha okhala saana wa erutthu, okhala wira khanihiyo n'okhaliha saana. Ni hiyo khanikhanle va wira nooniwe. Masi niri va okhala wira ninnoona Mukhalelo Anyu. Ni hiyo noosuwela wira Nyuwo muri

vaava. Ni hiyo niri va wira nittharuxiwe. Ni niri va, nisuwelaka wira niri mpaani mwa Muluku. Ni ninnoona saana okhala va, khivancala ohikhala saana xeeni nikhanle aya, weemela, ni—ni okilaathi othene oophunyana, masi hiyo niri va okhala wira ni—ninnoona wira Muluku ori vaava.

³⁷ Ni enamuna emosaru mmiravo ole aakhanle awe woonaka ohiy'ule, okathi Paulo aalaleiye awe ohiyu wothene, mutthaka xeeni woolekela, alakela okhuma otupweela wa nsuwa mpakha okhuma wa nsuwa, voosiisu aya. Nto mmiravo mmosa okilaanthe-ene osulu iwe, khumora ni awo yuupuwela wira aahikha. Nto Paulo khuphiteerya ni erutthu awe, nto Erooho ya Muluku yaari mwa namitthaka khuruuha-tho erooho y'ekumi mw'erutthuni mwa mmiravo. Nto owo khwira, "Onookhala saana," nto mmiravo owo khukhala mukumi. Owo aahicaliwa n'ile Paulo aahimyawe.

³⁸ Ni, Muluku, hiyo ninnicaliwa voosiis'ula ele Erooho Yoowaarya ekhanle aya ohimeeryaka mirima sahu. Ni ninvekela wira Nyuwo munkawele Yolya y'Ekumi wa khula mmosa a hiyo, wira naakhumaka va olelo, wira nihikhume empa ela atthu yaale naaryahu okathi ovolonwe ahu. aKritu ekhale vakhiviruxa ni Nyuwo. Anatampi erukunuwe olelo. Aretta evonihiwe. Ni wira Omwene wa Muluku onaattamele hiyo, wala nave okhale mwa hiyo. Vano hiyo ninvekela mwa Nsina na Yesu Kristu, niwehereryaka Erooho Awe wira enivahe Masu. Amen.

³⁹ Vano nrowe nisome Yoolempwa emosa, ekhanle... Masu a Muluku okathi wothene t'ari ekeekhai.

Nto vano, ni khula mmosa, kinnoona wira khamunreere waareerela murima ale yeemenle. Kinnimoona mutthu ovenya ni okilaathi, ni onvaha mutthu mukina opuro. Ti yooereera saana. Kaanithuna naakhalanne opuro munci-ene, masi khanirina tu, okathi ula.

Mmukhunle Matewu 27, ni ninrowa osoma opacerya versiikulu 11, nto nuumala ninrowa olavula mwah'ola.

Nto Yesu aaheemela ohoolo wa kuvernatooro: nto kuvernatooro aahimukoha, airaka, Nyuwo mwa Mwene a aYuta? . . . Yesu aahimuhimeerya wira, Nyuwo moohimya.

Nto ootheriwaka ni makhulupale a anamukuttho ni mahumu, owo khaakhunle etthu.

Nto Pilato aahimwiirela, Khamuniwa itthu sinoohimyanaayani atthu ala?

Nave owo khaakhunle nnakhala nuulumo nimosa; tivo kuvernatooro aahitikinihiwa vanci-ene.

Vano oniirani ku—kuvernatooro . . . aahilimalala waataphulela atthu namutthukweliwa mmosa, awo yaamutthunaaya.

Ni awo yaahikhalana nto namutthukweliwa oosuwelaxiwa, nsina na Baraba.

Tivo okathi yaathukumannaaya vamosa, Pilato aahiwiirela, Taani omphavelaanyu wira kootaphuleleni? Baraba, wala Yesu oniihaniwa Kristu?

Okhala wira owo aanisuwela wira awo yaanvarenle nrima.

Nave owo akilaanthe mpwaro mwa milattu, amwaar'awe yaahiruma, oleeliwa wira, Muhikhalane... naata ni nazariya ola: okhala miyo nkireere ohaawa moolohani mwaha wa yoowo.

Masi makhulupale a anamukuttho ni mahumu yaahaathipeleliha atthu wira envekele Baraba, ni emwiirihe Yesu.

Kuvernatooro aahaakhula khuwiirela, W'atthu ala aili onimphavelaanyu wira kootaphuleleni t'uvi? (Nkuupuwelani yeeyo!) Awo khwira, Baraba.

Pilato aahiwiirela, Kimwiirihe exeeni nto Yesu yoowo oniihaniwa Kristu? Kimwiirihe exeeni nto Yesu yoowo oniihaniwa Kristu? Nto othene yaahaakhula wira, Akhomeliwe vamwiikimanyu.

Nto kuvernatooro aahiira, ... otthenkeni yoola? Masi awo yaamutepa okhuwela, yiiraka, Akhomeliwe.

Nto Pilato voonalyaawe wira khaawerya wira etthu, masi onyakula wira otepaka, aahikuxa maasi, khunyawa ohoolo w'atthu othene, iiraka, miyo nkirina etthu ni ephome ya nazariya ola: mwiisoonele mmansinyu.

Nto atthu othene yaahaakhula, yiiraka, ephome Awe enimorele hiyo, ni an'ihu.

Nto aahaataphulela Baraba: ni aahiruma omaniwa Yesu, khwaavahererya wira yamukhomele vamwiikimanyu.

⁴⁰ Elatarato xeeni yooxankiha! Kiniihana yoosoma ya yeela, mwatthuna vale olepa siiso, wala wiihana siiso. Ni khino efiita yaahaana wiihaniwa sa: *Kimwiirihe Exeeni Yesu Yoowo Oniihaniwa Kristu?* Nto mwaha kintthunaaka orumeela, numala eyo okhala yoosoma, kintthuna kirumeele mwaha, “Ni Yesu Mmatatani mw'Anyu.” “Ni Yesu Mmatatani mw'Anyu, Munrowa wira exeeni?”

⁴¹ Yokhumelela ahu empacerya, voosiisu ula, musaala mwa ophuka, mwemmo Pilatu, kuvernatooro, iitthaniwaawe va yookhumela, wira—wira iire ni—ni aphuke. Waari oxaka voosiisu, okathi vakhani ohinatthi oxa, ni owo aahihaaxiwa

orupa wawe, ni—ni aahiitthaniwa wira iiwe m—mwaha wa Mulopwan'ola.

⁴² Waari okathi wo okhomeliwa wa Pwiy'ahu ni Moopoli, Yesu Kristu. Owo khaa—Owo khaairale etthu, awo yaakhanle aya ophwanyaka mwa Yoowo, ni Owo aaha—Owo aahaakhula sothene. Waari okathi waarinaaya okhalaka siiso.

Khiyaavo etthu ekhanle okhumelelaka ehikhanle etthu ottuli waya wira ekhalihe siiso. Nihaana okhala niwoko khata wa itthu sothene siniiraneya. Okhala wira em—empacerihiwa, vekeekhai, ni e—erooho eri mwa sookhala, ni mw'atthuni, ni sikina. Nookhala niwoko naya, ni e—ni etthunelo, ni nihaana okhala niwoko.

Nto eyo, etthu ela yaarinaaya omwiiraka Mulopwan'ola muulupalexa otonko okhala mulaponi, wala aakhanle okhalakhala; etthu yiiraneieye aya siisa, okhala wira waari okathi wa eyo wiiraneya. Munnona? Yaahaana okhala siiso, ni khiyaakhanle enamuna y'otthyawa. Wa—Waahaana okhala okathi yoowo.

Ni Yesu aahirwa elapo ya vathi voolikana ntoko Masu a Muluku yaahimmyaya wira Owo aamurwa. Owo aahiira voolikana ele Masu yaahimmyaya wira Owo aamwiira. Owo aakhanle mukhalelo, voolikana, ni Muluku aahisuweliha, ahiiso aahooniherya, Epyo ya okathi yoowo. Vano muupuwele, Muluku...

⁴³ Bibilia ompacerya mwa Maphattuvelo ni onrowa mpakha Wiisuupulula. Vano va ti nri nisomi miyo—miyo kinthunaaka wira musuwele saana, wira...Moone, mwa khula nloko yoolavuliwa, mBibiliani, etthu khata wiiraneya muhina mwa khula nloko.

Ntoko Daniyeli oonale e...aataphulenle yooloha ya Napukutonosoori; moota omwene w'Amalapo waarowaya orwa, ni moota awo yaarowaya omora, ni moota yaarowaya omalela. Ni khula mmosa w'atthu awo mwa maloko ale ni ilapo iye, owerya iwe w'Amalapo oneettiherya, oneettiheryaka olumwenku, wiirale aya oratta-ene voolikana ni enamuna yoowoono yaahimale aya wira yaamwiira.

⁴⁴ Okathi Napukutonoosori, muru wa weero, aakuxiwawe, nto aMedo-Persa khukela; ni mukhalelo aya, voolikana ni mu—mukhalelo wa ikaruma, ni voolikana ni ele profeta ohimmye awe, voolikana ene. Napukutonosoori, muru wa eweero, okhanle wuulupalexa ni woopacerya wa Omwene. Nuumala aMedo-Persa akhalaka eparatha. Vano nto orowa vathi mutarani, sa—sa eporonse. Ni khula eyuuma enkhala yoolipaxa ni yoolipaxa; eweero ekhalaka yoowoolowaxa. Ni emmalela muyuumani, ekhanle yoolipaxa wa sothene iyo, ti eyuuma.

Vano, khula mmosa wa imwene iye orwiiye voolikana ene, mwa mukhalelo aya, enamuna profeta aahimmye awe wira

saamwiira. Nto owo iira-ni? Owo aala epyo wira ilapo soone, ni khula okathi omwene owo waakelaaya, waahaana wira voolikana ni ele Masu ahimmye aya.

⁴⁵ Vano nto Mesiya aahaana orwa vanlakani. Ni okathi Kristu orwiiyaawe, Owo aahaana waakhula Masu ale a Muluku yaari wira emaliheriwe, profeta aalavunle awe, etthu Owo aarowaawe wira.

Moise iirale, “Owo onrowa okhala pro—Owo onrowa okhala Profeta oolikana ni miyo.” Ni waakhanle. . . naakhalanne okathi wo olikanyiha yeeyo ottuli wu ni wooniherya moota okathi ule wowoopiha, Isarayeli aaryaawe mweepotthani ni wEjitu, ya moota Moise aayariwaawe mwaana, ootikiniha, oomeekha; ni moota owo—owo aakhumelenle awe, ni aavenyihiwe awe, ni moota owo aapithihiwe awe muttheereni; ni moota aaphiyenrye awe okhala muhooleli, aahiwela mmyaakoni khuphwanya ikano, khutthika. Ni khaari muhooleli paahi; masi owo aari namukuttho, ni mwene, ni kuvernatooro. Itthu iyo sothene, ni moota eyo yaamuthooneryaya Kristu oratteene. Nto Moise iirale, “Apwiya Muluku anyu anoomuthanla Profeta onlikana ni miyo.” Munnona?

⁴⁶ Vano, okathi Kristu oyariwaawe, Isarayeli aari-tho mw’epotthani ni Omwene w’oRooma. Nto Owo aari exeeni? Aayariwe Mwaana oomeekha, ni ootikiniha, moota Owo aaleliwe awe. Moota Owo aaronwe awe mmyaakoni, khukhuruwa khwira, “Nyuwo muhiwa ele ehimmwe, n’ale a khalayi, ‘Muhiiye.’ Nyuwo moowiiwa wira, ‘Muhiraruwe,’ masi Miyo kinihimya wira, ole oninweha muthiyana anwereihaka murima, oomala oraruwana.” Namavaha Ikano, moone, ni Mwene, Namukuttho, Profeta, voolikana ni yoowo. Vano itthu iya sothene saahaana omaliheriwa, ni oryeene vale okathi owo wa ekumi ya Mesiya, okathi eyo yaalipiheriwaya voolikana.

Vano, nla pooti okhala nisomi nookiserya noorakama kiniixuttihaaka mwa okathi vakhani. Kintthuna wira nvare saana vano.

⁴⁷ Okathi Masu alavuliwe aya wa nloko nla, onoorowa okhala mutthu onrowa okhumelela onrowa omaliherya Masu awo, okhala wira Muluku oolavula Yaawo. Iwo olipiheriwa wa Masu oolavuliwa. Ni Yesu aahimaliherya khula yootthuneya, ni yaari Masu, oolipiheriwa ntoko Mesiya, voolikana. Aakhala-tho Masu, oolavuliwa mBibiliani, a mahiku ookiserya. Masu awo ahaana orweela ekumi.

⁴⁸ Ni hiyo ninniphwanya va wira, wira mahiku a Pwiya’ahu, ekereja yaahimukhootta Owo ohinatthi orwa musaala wa ophuka wa Pilato. Awo yaahimukhootta Owo, okhuma nihiku nenle muteko Awe waapacenrye aya olaleerya ni waaleela Ekeekhai ya Masu. Vano, awo khayaawenrye osuwela saana eyo, moota Owo, oryeene Mutthu, aaweryaawe osuwela ele yaari

mmurimani mw'atthu. Awo yaasuwela vakhani, wira, Masu ti Muluku! "Ni Masu," Bibilia ohimmye wira, "annilamula miyuupuwelo ni sintthunaaya murima."

⁴⁹ Nto awo yaatthuna omwiihana Owo erooho yootakhala. Owo khwira, "Miyo kinimoolevelelani mwaha wa yeeyo. Masi okathi Erooho Yoowaarya enrwaaya wira etthu emosaru, olavula nuulumo nimosa nooveeha Yeeyo khenkhalakhala eleveleliwaka."

Ni itthu iya sothene Owo aalaleenrye awe wira saamukhala nihiku nla, etthu ehaana oruuhela yeeyo ekumi. Masi okathi Eyo enruheliwaaya ekumi, enrowa okhala yoovirikana saana ni ele atthu anuupuwelaya, mpakha anro—anrowaaya okhala paahi ale Oothanliwa anrowa woona Eyo. Kweekwe, ale Oothanliwa paahi ti yaawo paahi anrowa woona Eyo, okhala wira aathanliwa ni aatthokiheriwa woona Yeeyo. Tivo, khivanweryaneya, okhala enamuna ekina.

⁵⁰ Yesu ohimmye wira, "Khimukhanle orwaaka wa Miyo. Khaavo onwerya orwa ehikhanle wira Atithi Aka anoomuruuha; ni othene ole Awo akivahale aya onimoorwa wa Miyo." Munnona? Munnona? Tivo khiyaakhanle hata enamuna. Owo iirale, "Mookhalana maitho nave khamunwerya woona; maaru, khamunwerya wiiwa." Khwira, "Tthiri Yesaya khoothale ahimyaka sa nyuwo." Munnona? Olaleerya s'eprofeta wa Yesaya okhumelelaka, wooniheriwa.

Muhiliyale eyo, va wala namwiiwa efiita, wira Masu a Muluku ahaana wooniheriwa. Muluku ohaana woona wira Eyo enniiriwa.

⁵¹ Siiso ntoko Yohani Mpatisa aatthokiheriwawe wira ahoolele orwa wa Kristu, aahaana okhala mutthu aarowa ovenya wira akhale nipuro nenlo. Masu awo ahaana omaliheriwa.

⁵² Vano okathi Yesu orwiiyaawe ntoko Mesiya oottikittheliwa, ni khwiira voolikana ele Masu a Muluku yaahimmye aya wira Owo aamwiira; nave nnakhala vo aYuta yaaphavela etthu ekina, "Mwene mmosa arwaaka ni ekopo ya yuuma mmatatani mwAwe," yeeyo yaari ohoolo saana. Masi Owo aahimaliherya khula Masu.

Nihiku nimosa oKafarnawu iwe, okathi Owo aakunxe awe Yoolempwa khusoma, (mooweha?) Owo aasomme paahi epantte ya Yoolempwa eyo. Vano nto Owo khupweha Eliivuru, khwira, "Olelo ela yoomaliheriwa."

⁵³ Waari okathi Owo waarinaawe olaleya mwaakha wa yopeeli, vano, Owo ahaasomenle-ni ekina Aya? Okhala wira Eyo eniira mpantta wa Orwa Wawe okina. Awo khayaaphavela osuwela eyo. Eyo yaari ya okathi Owo onrwaawe.

Masi wa okathi Owo aaryaawe, mwaha wa yeeyo Owo aawenrye awe ohimya wira, "Soolempwa iya soomaliheriwa

olelo vamaithoni vanyu. Vaava va nyuwo munnoona. ‘Olaleya okathi wootthuneya, ni waalipiha ale ooripiwa murima, ni waavoniha aretta.’” Ti yeeyo Owo aarweenle awe.

Ekina Aya yaari—yaari wira eruuhe Olamuliwa w’Amalapo, ni sikina, tivo eyo enrwa voottharelana. Moone, Amalapo yaahaana omukhootta Owo, toko.

⁵⁴ Vano, wookhomeliwani, vaavo hiyo varyaahu olelo mwa mwaha, wa, “Yesu mmatatani mwanyu.” Masu a Muluku yaahilipiheriwa voomalela, yaahooniheriwa emaara ti emaara, wira Owo aari waakhula wa Masu a Muluku. Vaavo alipa-oolepa ikano...

⁵⁵ Moone, Muluku ookhalana Eyo Yootthokihiwa ene. Ennitthuniherya muteko osoma. Masi, moone, awo ankuxa moolumo a mutthu mukina wa Yaawo; nikhuru khata n’atthu. Awo t’ohoonaxa Ekeekhai, wira, okathi Ekeekhai enooniheriwaya, awo anoovonya woona Yeeyo. Masi, moone, Muluku t’exariya, Owo ohaana Eyo yoolempwa va. Owo ohaana yoolempwa, vaava va Muliivuruni, etthu enrowa wiiraneya olelo, tivo eyo enoomaliheriwa. Masi akina ahitthomeliwe woona Eyo, khankhalakhala yoonaka, moone, awo—awo arina Eyo yothene yootapanyiwa.

⁵⁶ Ni ti siiso awo yaarinaaya okathi ule. Awo khanasuweleke wira Ole aari Yoowo. Vano ni ithooneryo wira Owo aari Namitthaka a okathi yoole, khaavo aakhanle okhoottaka. Profeta Awe aahihimya yeeyo; owo iirale, “Miyo, kihaana oyeva, masi Owo onimunnawa. Miyo nkimphwanela otaphula ixapattho Sawe, masi Owo ori eriyari anyu naanaano va,” aahimye ti Yohani. “Nto Owo onimoorwa. Ni epaso yooheliwa vamutathaarini va mwiri; ni miri sihiniima mihokorokho sinookumihiwa mutakhwani, wira, ahiiso okumihiwa va—mmatta mwa eviteera, wala va—vamattani. Khonrowa-tho okhala.”

⁵⁷ Vano, ninniphwanya wira itthu iyo saahiiraneya voolikana ene ntoko Owo saahimye awe. Owo aaniwerya olamula miyuupuwelo saya mmurimani mwaya. Owo aari Profeta. Itthu sothene Owo ohimye awe khalayi ene, siiraneieye voolikana siiso Owo aahimye awe.

“Miyo kinwela oYerusalemu. Weiwo kinoovahereriwa mmatatani mw’atthu anatampi. Ni awo anoomuhaaxa Owo vootakhala-vo murima, ni Owo onrowa okhomeliwa vamwiikimanyo. Nto mmurotoni mwaya Owo onoovenya-tho.” Masi iirale, “Moone wira muhimuleele mutthu etthu ela.” Ni Owo aahaakhaliha oohoona Eyo, wira ahisuwele saana mpakha Eyo omaliheriwa.

⁵⁸ Moone, imaara sinci-ene wira Owo onninitthuniherya okhala oohoona mpakha okathi Eyo entthuneyaaya wa hiyo. Owo onninitthuniherya okhala oohoona wa itthu

sinoonaahu olelo, maana ola p'ukathi omphavelaahu Yeeyo, wira elipiherye nihiku nryaahu. Munnona? Axitiith'ihu khayaasuwela itthu iya. Bibilia ohimnye wira awo khiyaarowa osuwela. Owo aarimwiipithiha, nto ma—mahiku ookiserya Eyo yaamuupululeliwa aana a Muluku; wala, wira, samooniheriwa, wira sooniherye ovuwa Wawe ni ottotopeliwa Wawe elapo ya vathi.

⁵⁹ Ni sothene Daniyeli aahimnye awe sa mahiku ookiserya, ni moota, “Ale ammusuwela Muluku aya yaarowaaya ovara miteko suulupale.” Ni Soolempwa sinci-ene paahi sitthukanaka nihiku nla ninkhalaahu! Moota wakathi iya sootakhala, sowootoha saarowaaya okhala mulaponi! Ni tthiri yeeyo ninkhаланahu vano ennimaliherya.

Awo—awo yaahi—awo yaahivahiwa okathi wo omoona Yoowo, nto, masi awo khumukhoota Mesiya aya.

Ni olelo etthu emosaru, etthu emosaru. Hiyo ninnivahiwa okathi, okhala wira Muluku khokhanle olamulaka ohitonko... okhalihwiwa naxariya wa olamula Wawe.

Vano, nyuwo mwaamuhimenrye mu—mutthu aarowa omukhuruwelaka rampha, uupaka; nyuwo mmweemexa, mwiira, “Yookhala e—ephaka mphironi ohitto iwo. Mwatthikela—ru muupa siiso, munimwiisiiva.”

⁶⁰ Nto owo khunaira, “Ethiru, miyo koosuwela etthu eniiraaka.” Vano, moone, ephome khekhanle okhalaka mwa nyuwo, okhala wira nyuwo muhaalopola voowooneya.

Ahe, Muluku oniira etthu emosaru ni Masu Awe. Owo onnaalopola voowooneya atthu mwaha w'olamuliwa onrwa, ni wooniherya ithooneryo Sawe ni mitikiniho sihimeriwe khalayi ene mBibiliani okathi yoowo. Owo onniwooniha, nto atthu anoovira vasulu va Yeeyo tu.

Kahi yookhweya mutthu orowa omooroni. Mutthu ohaana owana wira aphiye omooroni. Wootha woopacerya mutonko anyu ohimya, mwaahisuwela wira yaari yoonanara. Sikaro oopacerya mutonko anyu onvura, mwaahisuwela wira yaari yoonanara. Yootakhala yoopacerya mutonko anyu wira, mwaahisuwela wira yaahivonyeya. Masi mmuupuweloni mwanyu, waahooleelani wira yaari yoovonyeya, masi voohihiyererya mwaavira ni luuxu oooxerya, mwaavira vasulu va ikhottiheryo. Nyuwo khamuncaliwa. Nyuwo munnitthuna wira eyo, khula enamuna, wira mooniherye wira mwa mutthu muulupale. Munnona? Masi, muupuwele, nyuwo munoowana wira murowe omooroni. Kahi yookhweya orowa omooroni. Muhaana okhoota Ekeekhai.

⁶¹ Muhinatthi okhalana ehasara, muhaana onvira luuxu oooxerya. Muhinatthi ophwanya ehasara, muramphani mmwe, muhaana, mookhalana ma—mapawe anlopola aheliwe. Masi, nyuwo, nyuwo murina enamuna anyu mmansinyu wa yeeyo, ti

siiso mutthu olelo. Ni owo onnisuwelaxa onvikana mutthu ti mutthu mukina, ni owo khonrowa wiiwelela i—ithooneryo ni olopolo wa Ehukhumu enrwa, n'ale animukhootta Kristu.

⁶² Vano nwehe, ni etthu awo yaakupanli aya omuhiya Kristu ula. Vano muupuwele ekereja ya nihiku nle, ohoono waya. Awo yaamukhoottale namwiiva oosuwelaxiwa, Baraba. Mutthu ooniheriwe okhala namwiiva, ni vekeekhai aawehererya ophukiwa wawe. Ni owo—owo aahooniheriwa o—okhala namwiiva, ni owo aari mutthu ootakhala. Nto mwaha paahi wo wira—wira Ekumi ya Yesu...

Yoowo, Owo—Owo aatharimunle awe. Owo iirale, “T’ani a nyuwo onwerya okihimyana etampi Miyo?” *Etampi* “ohaaminii.” “Kaahivareke miteko s’Atithi Aka, weeso muhikaaminiki, vakhala wira nkihimmye Ekeekhai ya Soolempwa, ni Soolempwa Ineene, soohimya sa Miyo. Mwaavaavye Soolempwa,” Owo khuhimya, “okhala wira mwa Seiyo nyuwo munnuupuwela okhalana Ekumi Ehinimala, ni ti Seiyo sinkikhalela Miyo onamoona okathi ula.”

⁶³ Masi awo khwira, “Owo oniikhaliha Muluku. Owo oniikhaliha etthu Mmansawe.” Owo khiikhalinhe etthu... Muluku t’omukhalinhe Owo Muluku; Owo aari Muluku. Owo aari omaliheriwa wa Soolempwa. Owo khonaikhaliheke Mmansawe etthu. Muluku t’amukhalinhe ele Owo aaryawe. Vano, nto, okhala wira waari okathi wa Masu awo omaliheriwa. Tivo, masi awo khayaawerya woona Eyo, okhala wira Eyo yaari yoovirikana ni muupuwelo aya wa muromolelo, etthu awo yaakanyerenrye aya mwaha wa Kristu. Ni yaari oohoonaxa wa Masu.

⁶⁴ Vano, ni ohiya yeeyo, wira yiihuluxe Mutthu ola, awo yaahaana omukupali namwiiva, oowoopopiha atthu, aari eteeni ya mmuttettheni, eteeni wa awo, namwiiva, yaahaana okupali yeeyo, okhala wira, wira—wira emokhootte Kristu.

Ni khula mulopwana wala muthiyana ohinatthi okupali etthu yoovonyeya, awo ahaana okhootta yooreera. Yookhala etthu ya ephattu, nookhala nlamulo wa yeeyo, wira muhaana okhootta etthu yooreera muhinatthi waakhela etthu yoovonyeya.

Ntoko simanlyaaka ohimya, wira—wira musyake ohimya etthu yoowootha... Nyuwo—nyuwo moohimya etthu yoowootha nvirikanyaka muupuwelo anyu wooloka. Moohimya etthu yoowootha nvirikanyaka muupuwelo anyu. Moohimya etthu yowootha nvirikanyaka ele ame anyu wala axitiithi anyu awiixuttihale-ayani. Wala, hata ephattu eneene eniwiixuttihani wira muhiireke yeeyo. Vano, tivo, nyuwo, wira mukhootte Ekeekhai, muhaana okupali yo—yo—etthu yoowootha, ni muhaana okhootta Ekeekhai muhinatthi okupali yoowoothiwa. Munnona?

⁶⁵ Tivo ti siiso atthu ala yiiralyaya, awo yaakhoottale Ekeekhai. Ni Owo aari Ekeekhaii. “Miyō k’Ephiro, Ekeekhai, ni Ekumi.”

“Wopaceryani naari Nsu, nto Nsu naari ni Muluku, ni Nsu naari Muluku. Vano Nsu nihiipaka erutthu ni nihiisooniherya ohoolo wahu.” Mwa Timoteyo Oopacerya 3:16, “Vekeekhayi esiiri yuulupale na nttittimiho, wira Muluku ohiisooniherya mw’erutthuni, ookwannyiwa ni matata ahu.” Muluku, Yehova! Eyo—eyo ti yootutuxa, ti yootikiniha, wuupuwela wira Muluku Yoowo ohenle e—e—eyeettelo ya nsuwa osulu, opanke ittheneeri sikhanelle suulupale vaara ikonto sene ovikana olumwenku ola . . .

⁶⁶ Nto emosa wa ittheneeri iyo yaapacenrye—ru orwa elapo ya vathi, mwa imiilya ikonto muloko khula ewoora, vano, saamukuxa miyaakha emilyawu emiya wira ephiye va; mwaha wo orakamaxa—wo eryaaya. Ni ittheneeri piili sikhani iwe, sinkhala ntoko okhalana isentiimeturu piili ni nuusu orakamelana waya, noonaka okhuma nno, iyo siri soorakamelanaxa ovikana siryaahu hiyo ni seiyo. Ni, nnakhala vo, khiyaavo hata emosa wa seiyo ehinkhala voopuroni vaya. Ni ekalaaksiya eyo yuulupale, oh, wulu, eyinnuwelo ni eyaattelo ya Muluku Yoowo owenrye opattuxa itthu iyo! Khula emosa enlipa ni ekina. Mwaha wa yeeyo enkhalaa ya ntoko siryaaya. Iyo sakhuma—ru voopuroni, eyeettiheryo yothene yaammora.

⁶⁷ Ti yeeyo yaakhumelenle wEdeni. Okathi Hawa okhumme awe voopuroni vawe ni sooruma sa Muluku, nloko nothene naahimora.

Owo t’uri mulattu olelo. Khinaarina okhalaka ookawanyeya mmitthenkesoni ni miromolelo, ni sikina. Hiyo naahaana okhala aana alopwana n’athiyana a Muluku, nivarenle—ene ekalaaksiya yuulupale ya olumwenku.

⁶⁸ oNova Yorke, esumana evinre, kiiwa mutthaka mmosa woohimmwa, ahiiso woolavuliwa ni Einstein, nasiyensiya muulupale, o—ole oniihaniwa ottoopore wa o—okathi. Ni kaari . . . kiiwa yeeyo. Nto kirowa omwiiwa Norman Vincent Peale, wa episikoloxiiya awe ya moota atthu yaarinaya wiiraka, wala weetta, ni wiikeliha mmansya mupisikoloxiiyani.

Vano, vanaasiwa Einstein, owo aalavula sa ekalaaksiya eri iwe eriyari ya eyeettiheryo, ottaiwene wa ittheneeri. Ni mutthu aawerya weetta mukwaha mwa eyaakuvelo, kookupali t’ohimmye awe, ya waarya, . . . Vano, kinoona wira, eyo e, . . . ikonto miloko mithanu na miraru ni thanu na mosa? [Munna Neville oniira, “Emiya emosa ni miloko mithanu na miraru ni thanu na mosa.”—Mol.] Emiya emosa, imiilya ikonto imiya miloko mithanu na miraaru khula esekuntu, waarya oneettaaya. Nto vano mukawanye yeeyo mwa minuutu mithanu, imilyawu kavi ni ipilyawu sa imiilya mwaarowaanyu okhala. Ni mi—miyaakha imilyawu emiya emosa ni imilyawu miloko miili sa okathi wa waarya saamookuxani wira mphiye ekalaaksiya

eyo. Vano nto miyaakha imilyawu emiya ni miloko miili, wala miyaakha imilyawu emiya ni imilyawu miloko mithanu; imilyawu emiya ni imilyawu miloko mithanu mpakha iwe, ni imilyawu emiya ni imilyawu miloko mithanu otthika.

⁶⁹ Ni yaahikumana ni etthu yaatikininhe yaawo. Nto awo, vamanle aya orowa iwe khutthika, yaamookuxani miyaakha imilyawu tthaaru wira mweette mukwaha owo, miyaakha imilyawu imiya tthaaru. Miyaakha imilyawu imiya tthaaru wira mweette mukwaha, ni, okathi onthhikelaanyu elapo ya vathi, vekeekhai mukhumme miyaakha miloko mithanu. Nyuwo munkela mwa Ohimala. Khekanle emalelo wa Yeeyo.

⁷⁰ Ni wuupuwela, wira, Muluku Yoowo opanke sothene iyo khukhalihia oratteene, ni khulavula yeeyo, aahikhuruwa khwiipaka erutthu eriyari ahu, wira anivuluxe. Ni wira Owo siiso onittittimihi ni Mukhalelo Awe woottittimiheya, wira Owo—Owo aamweemela va elapo ela y'etampi mahiku ookiserya, ni wooniherya wira Masu Awe t'olikana, okhala wira Owo ohaana omaliherya Masu awo. Amen. Eyuulupale ni exariya ya Ole muulupale onvarelela itthu iyo mmatatani mw'Awe!

⁷¹ Nwehe, ilapo. E—ekereja ehaana okhoota Masu Awe, toko. Vano, ekereja vamukhootale aya Owo, khumwiihana Owo “Pelizepuli, wala erooho yootakhala,” nto aahiruuihiwa ohoolo wa kuveerunu, wira nloko nothene naahaana ohukhumwa. Vano hiyo ninimphwanya Yesu, voosiis'ula, ohoolo wa—kuvernatooro, Pilato, muRooma, wira aphukiwe. Ni ninniphwanya wira ekereja yaahimukhoota Owo, toko, okhala wira awo khayaaminni Mutthaka Awe, okhala wira awo khayaasuwela Masu.

⁷² Yesu aahaalela, “Nyuwo mwaa—nyuwo mwaamwiiwale Moise, mwaamwaamini Masu Aka, okhala wira ti yoowo olavunle sa Miyo.” Munnona? Vo ari Masu yaawo profeta... Yaawo, a—Apwiya animurweela profeta, ni profeta aahilavula Masu a okathi waarowa orwa. Ni va Awo yaahisuwanyeihiwa, khwira, “Nyuwo muniira munnimusuwela Moise ni owo ti muhooleli anyu. Nyuwo khamummusuwela Moise, nnakhala khamunsuwela Masu awe.” Mwa moolumo makina, Owo iirale, “Miyo ka Masu. Miyo ka Masu oosuwanyeihiwa Moise olavunle awe wira yaamurwa, vano nyuwo munookilamula.” Munnona? Mwaha wa ilimalelo saya, moone, ekereja yaahimulamula Owo.

⁷³ Vano, hiyo ninimphwanya Owo vano ohoolo wa Pilato, ni ookupaliwa voomalela, nave, oosuwanyeihiwa wa okathi, wala ekereja, ni namitthaka a okathi. Awo yaahivahiwa okathi wo wona ni waamini, masi yaahikhoota Yoowo. Awo yaakhootenle-ni Yoowo? Anci-ene aya yaanithuna waamini Yeeyo; masi ilimalelo saya, kahi atthu, masi ilimalelo saya!

⁷⁴ Vano, moone, ntoko Nikotemu saarwiiyaawe ohiyu, nto owo khwira, “Mwixuttihi, hiyo noosuwela wira Nyuwo mwa

Mwixuttihi onkhuma wa Muluku. Hiyo noosuwela wira Nyuwo munkhuma wa Muluku. Khaavo onwerya wira itthu iya Nyuwo siniiraanyu ehikhanle wira Muluku ori ni Yoowo. Hiyo..." T'ani okhanle "hiyo" owo onaahimyawe? Ekereja, aFarisi, ahooleli a nihiku nenlo. "Hiyo noosuwela. Hiyo nookupali voomalela wira Nyuwo mwa Mutthu yoowo." Vano nto awo yahaaweryela-ni okupali? Mwaha wa, eyeettiheryo aya. Kintthuna wira eyo ekele muhina saana, okhala wira ti yeeyo emphiyeryaaka. Munnona? Eyeettiheryo awo yitakanxale-aya, yaari yeeyo awo yahaaweryaaya weettiha. Anaamwi yoonale wira Ole aari Mesiya, masi eyeettiheryo awo yaaphitaanne aya khiyaatthuniherya awo okupali Eyo.

Mu—munniwa saana? Vano kintthuna kikohe, muthukumano ola onoonaya, akavi aniiwa saana etthu enihimyaaka? Nvenxe matata. Vaareera.

⁷⁵ Vano, eyeettiheryo! Awo yaahaamini Iyo, ni yaahisuwela wira yaari yeeyo. Moota kaatthunaaka ohimya yeeyo olelo! Hiyo ninnoona etthu entthuneya wira ekhale va olelo, ni ninnoona Yeeyo, masi eyeettiheryo khenaatthuniherya awo okupali Yeeyo. Awo arookelihiwaxa miixuttiho ni eyeettiheryo! Moone, kahi mutthu, ti eyeettiheryo.

Ntoko simanle aka ohimya sa Mukhulupale onaammalaru wiwiwa. Kahi mutthu; mpakha vansuwelaaka, owo aari mutthu ooreera murima, owo khiirale etthu yootakhala mpakha vansuwelaaka. Masi eyo eyettiheryo. Kahi atthu; ti eyeettiheryo.

⁷⁶ Khayaari aYuta; yaari eyeettiheryo aya. Eyeettiheryo ele ti yaamulamunle Owo, okhala wira eyo khiyaavilela eyeettiheryo aya. Munniwa saana? Vano, itthu imosaru siniiraneya vano. Ni awo yaamuthanlale nwanani ola a atthu, namwiiva.

Masi mwaha ene vano ookela-mo kuveerunu. Tivo kuveerunu ohaana ohimya ephukelo ela, okhala wira, okumiha ekumi, ehaana orwa ohoolo wa kuveerunu. Awo khiyaatthuniheriwa wira eyo, okhala wira yaari vathi va—va ohoolela wa oRooma, ni khiyaakhanle okumihaka ekumi khivaacala moota xeeni ekereja aya yaahimyaaya, "Nihaana wira." Vano, awo—awo khiyaakhanle wiiraka eyo, toko, Rooma ohaavanhe waakhulela. Tivo, yaahaana oruhiwa wa kuveerunu. Vano kuveerunu ookelihiwa mwa etthu iyo.

Vano, eyo yaahikhale elatarato y'olelo, nkuswenle exeenii. Moone, voolikana ene!

⁷⁷ Ekereja enookhootta, vano kuveerunu ookela-mo. Okathi waahiphiya vaavo elapo, yothene, othene, yaarinaaya orwa. Mwaha ene waahipakiwa. Wooniheriwa waari mmatatani. Elapo yothene yaahimukhootta Owo, ni aruuhelaka oviruwa wa Muluku wa yaawo. Ni ehinatthi e...Hata ekereja yaahimukhootta, nto eyo yaamuruuha oviruwa mukereja. Masi

vano elapo yoomukhootta Owo, ni oviruwa waamwaarweela othene.

Ni, olelo, olumwenku woomukhootta Owo, wira oruuhele olamuliwa olumwenku wothene. Ilapo sothene sihaana olamuliwa.

⁷⁸ Ni noosuwela wira eyo yaahiraneya okathi wa mukhulupale a anakhotto muulupale muRooma, Tiitu. Owo aahimukuttelela Yerusalemu, vano nto vookiserya paahi. . . Awo yaahaakhuura aana a mmosa ni mukhwaawe; yaahikhuura mapapatthu a miri, ni malaxi a vathi. Vano—vano nto Tiitu aahikela khuphomola makokoro khupaha muttethe, nto ephome yaahikhoowa m—mmaiphironi siisaale, weiwo owo aawiivakanse awe.

Ni yaahaana. Muluku a exariya ahinatthi waatthuniherya athu, Owo aathanlale-awe, orwa vathi va etthu ntoko eyo, ni—nihaana okhala niwoko nootthuneya. Owo naxariyaa. Sawawe—ikano Sawe sinvekela exariya Awe. Nto ekano ehirina ehukhumu kehiyo ekano.

⁷⁹ Kaahimmyeru wira, kaapanke-ru ekano opooma nno, “Onkhala mu—mu—muulutha ovira ni luuxu ooxeerya,” vano nto khuhikhalana ehukhumu wa yeeyo, nyuwo mwaamutthikela nviraka ni aluuxu ooxeerya. Masi ehaana okhala ehukhumu.

Nto ehukhumu ya ekano ya Muluku, okhootta mutthokiheryo Awe, onkhala okhwa. Nto waahaana okhala okhwa, tivo yaahaana olinvwa.

⁸⁰ Hiyo nimphwanyaneya moophukiwani ntoko yoowo voosis’ula, olumwenku wothene, ophukiwa. Miromolelo sothene sookhootta Masu. Miyo koosuwela wira ela eniiweya voolipa saana. Ni kintthuna wira arumeyi aniwa, ari va ni ale mufiitani, nave, ephavele wiiwa saana ela vano, kimpavelaaka okhaliha yoowooneya oratta-ene. Masi kinvarelela mwaha aka, ahiiso kinihimya mwaha aka va, ni kinihimya wira hiyo nimphwanyaneya, olelo, musala mukina m’ophuka wa Pilato.

⁸¹ Nyuwo muniira, “Miyo kaakhanle-ru iwe, kaamulavula kimweemereryaka Yesu Kristu.” Ni, ahe, munihimya exeeni wa yeeyo olelo? Eyo t’itthu ene. Munnona? “Khivancala mootaxeeni ekereja yaamukhoottale aya Owo, kaammweemererya Yoowo.” Mookhalana okathi. Uh-huh. Munnona? Awo—awo yaaroomukhootta Owo.

⁸² Vano Owo onoophukiwa, olelo, wala onoomala-ru ophukiwa, wala, onoophukiwa, wira epakiwe eyeettiheryo ya molumwenkuni, yeeyo eniihaniwa, mwaataano wa ikereja, wira—wira—wira epakiwe o—oMwaataanoni wa ekereja ya Mulaponi mothene. Vano, nto awo yiirale exeeni? Awo aroothanla wira animwiiraana mara ni anookhalana mwaataano wa ikereja.

Ni mwa Mwaataano ola wa Ikereja, wira ikereja sothene iya sihaana wira mpantte wa mwaataano ola, wala, vaahikhale siiso, hata khamunrowa otthuniheriwa olaleya, nnakhala khamunrowa otthuniheriwa okhalana mavekelo w'aretta. Ni ekerej'anyu pooti orumeeliwa etthu p'itthu awo anthhunaaya orumeela. Awo yatthuna opweha-mo ikaaxa, wala ikaruma sa ekhotto, wala etthu p'itthu awo anthhunaaya wira, nyuwo khamurina weettiherya eyo nnakhala. Nyuwo muniira mpantta wa Mwaataano wa Ikereja wala khamuniira mpantta.

Nto eyo ti eyeettiheryo empakiwa wenno Estadu Unidu, emmaliherya Yoolempwa, voolikana. Eyo emmaliherya ele Apwiya akihimenryaya mwaakha wa 1933, moone, ni neemenle okathi yoowo voosiis'ula.

Ni Yesu Kristu, Masu, onoophukiwa, olelo, ntoko saaryaaya vamwiikimanyo, nto vano Owo ori mmatatani mwahu. Owo ori mmatatani mwa olumwenku. Masu aasuwanyehiwa voowooneya, molumwenkuni mothene, moone, ni Owo omphwanyaneya moophukiwani. Miromolelo sothene soomukhootta Owo. Nto vano Owo onoophukiwa ntoko e... Mowaataanani mwa Ikereja, vano awo annimukhootta-tho Yoowo ni othanla ntoko siiralyaya okathi ule.

⁸³ Moone, ephattu mwa wahala enoottikhela, okhala wira ephattu entthikhela vamosaru. Miri sinnitthikhela sinnuwaka, ni mihokorokho mikithi sinnikhuma, ni maluwa, ni olumwenku onnirukunuwa siiso ntoko kweekwe oniirakaaya. Eyo ephattu. Ni ephattu ya khula okathi ennikumiherya, emaara ekina, ni enkumiherya mo—mooniheryo wa ole—ole—ole waari mukhalelo ohinatthi owo. Ni, olelo, hiyo nimphwanyaneya-tho nryeene nipuro nenlo.

Vano, Yesu aari “Masu,” Yohani Oowaarya, kapiitulu 1. Hiyo othene ninnaamini Yeeyo. Owo aari Masu. Nto okhala wira Owo aari Masu... Xontte mwiiwe saana. Owo aari Masu, ni Owo aahaana okhala oovirikanya eyeettiheryo.

Vano awo khaya—awo khayaamukhontte Owo mwaha wa miiriirya Sawe. Khiyaari mwaha wa yeeyo. Awo yiirale... Owo iirale, “T’ani onwerya okihimyana mulattu?”

“Ni yootakhala xeeni Owo iirale-awe?” aahimbye mwaamuthiyana. “Yootakhala xeeni Owo iirale-awe woohikhala waavoniha aretta?”

⁸⁴ Khwira, “Hiyo khanimmulamula Owo mwaha wa itthu iya.” Munnona? “Hiyo nimmulamula Owo mwaha wo wira Owo, oryeene mutthu, oniipaka okhala Muluku.” Ni Yoolempwa saya yaawo saahimya wira Owo aarowa okhala Muluku.

Mwa Yesaya, profeta muulupale yoowo olempe Iliivuru miloko mithanu na mosa ni thanu na mosa sa Yesaya, ni ompacerya ni e... Wopaceryani, ntoko wopaceryani; ni eriyari y’Eliivuru onrwa Yohani Mpatisa; ni ommalela omwene

w'oMileeniyu. Ni Iliivuru miloko mithanu na mosa ni thanu na mosa mBibiliani, ntoko sikhanyaya ikapiitulu miloko mithanu na mosa ni thanu na mosa mwa Yesaya. Ti yoothhokeleleya wira enlikanela siiso. Yesaya ola 9:6, owo ohimnye wira, "Nooyareliwa Mwaana, noovahiwa Mwaana mulopwana; nto Nsina Nawe onrowa wihaniwa, 'Namiruku, Mwene a Murettele, Muluku a Ikuru, Tithi a mahiku othene, Oothamaleya.'"

⁸⁵ Nto ilimalelo sa ohoona, wala iyeettiheryo, khisaawerya woona wira Owo aari Muluku; ni profeta aya, ale jaarweenle Masu, yaahimnye wira Owo aarowa okhala Muluku. Iyeettiheryo sa ohoona! Tivo awo yaahikhootta Masu, nto yaamutthunne namwiiva voopuroni, Baraba.

⁸⁶ Ni, olelo, Masu, akhalaka oowooneya wa nihiku nla, aalipihiriwa. Aakhalihiriwa eekeekhai. Ahoonihiriwa okhala Ekeekhai. "Nto mahiku ookiserya," ntoko Yesu sihimnye awe, "ntoko saaryaya mahiku a oSotoma," ni siiso, "siiso onookhala orwa wa Mwaana a mutthu." Muluku, Mwaneene, Yoowo aari Masu, aahihimya khalayi ene okathi wa woomalelani ni etthu jaarowa okhumelela; ni wira Waarya waamukhumelela okathi wa makaaripi; ni moota, Malakhiya 4, Owo aarowaawe oveleeliha itthu iya ni olipiherya.

⁸⁷ Ni yooruuihiwa nipuro na ethanlelo, nto ikereja sirookhootta Eyo. Nto ikerejea sintthunne exeeni? Namwiiva Masu, ole onkuxa eyeettiheryo. Eyeettiheryo yakhala yoovirikana ni Masu, nto eyo ti namwiiva Masu. Nto awo atthunne elimalelo ya muromolelo, ohiya Masu eekeekhai yoonihiriwaka ni elipihiriwaka wira Owo Mulukuu eriyari y'atthu; ni siyensiya, mwa ilatarato, Waarya, Nlaikha nimosaru n'Apwiya, Nripu na Mooro.

Mmosaru Yoole aakhanle elapo ya vathi mw'e—mw'erutthuni mwa Yesu Kristu, ohoorwa mw'atthu Awe mahiku ookiserya, vaavo siyensiya okumihenrye awe elatarato Aya. Ekereja ehoona miteko Saya. Yoosuwanyeihiwa voomalela, ni ifiita ni sothene, mulaponi mothene, ni yoorumeeliwa voomutthu.

Ni nlelo, mwa sothene iyo, iyeettiheryo saya sintthuna Mwaataano wa Ikereja wira silamule Ekeekhai. Amutthunaka namwiiva aarowa ottipihia, wala weemexa, wala ohiya ota. Ni, enimwiira, awo animweemexa Etthu ene eyo. Ni Mwaataano wa Ikereja ohaana wira. Vo ti vari ekanyeryo ya nxeni; nwanani a Kristu, avirikanyaka Masu, akhanle Kristu. Masi kahi ipaphe- . . .

⁸⁸ Awo anuupuwela wira elimalelo. Awo anuupuwela wira ilimalelo saya ti sa Muluku. Munnona? Masi khenlikana ni Masu, ni nnakhala Muluku khonlipiherya wira ti yoolikana. Yesu eemenle ni Masu, masi kahi ni mwaataano aya; masi ni Masu. Ni Masu yaahooniherya wira Owo aari Muluku.

Ni Awo annooniherya olelo wira Owo Mulukuu, okhala wira Awo ankhala Ekumi emosaru, Awo aniira etthu emosaru eriyari ahu Awo yiiralyaya ottuli wu, ni aahimya khalayi ene.

⁸⁹ Vano awo aniira exeeni? Awo ankupali etthu emosa e... Awo aamala, okupali, eyeetiheryo emosaru enrowa okhomela Eyo vamwiikimanyo. Ni okhomeliwa ohikhala muromolelo vootaphuwa ori mmatatani. Eyo ekeekhaii.

⁹⁰ Vano, eyo khenvirikanya Soolempwa. Ti yoolikana ni Soolempwa. "Vano awo aapaka elatarato ya nxeni." Yiiraanihaka miromolelo sa molumwenkuni mwa oPrustante omosa, epakaka ekanyeryo ya nxeni, elatarato ya nxeni, voolikana ni Wiisuupulula 13:8. "Vano awo yaahipaka elatarato ya nxeni."

Nxeni ti "Rooma." Hiyo othene noosuwela eyo. Masi kweekwe onkhalaka Rooma, othene...Vanweryaneya sayi okhala—vanweryaneya sayi okhala Ruusiya, Bibilia ohimmye-ene wira Rooma? Moone, atthu ankhalana moonelo woovonyeya. Munnona? Vanweryaneya sayi okhala etthu ekina, ehimmwe-ene khalayi ene wira ehaana okhuma oRooma?

⁹¹ Mutthikele-tho mwa Daniyeli, eyuuma ni oloko munawoni; eyuuma khenamaleke, okhuma makutha mpakha wookiseryani. Ni khula mutthu onnisuwela wira Ruusiya hata khaasuveliwa okathi owo. Aari Rooma. Ehanasi yooxeerya aari Rooma. Kweekwe ti Rooma. Ni eyuuma eyo khenarukunuwe ekhala etthu ekina, okhuma Rooma okhala etthu ekina; onkhalaka Rooma. Nto nxeni ti Rooma!

⁹² Ni Rooma aahikhalana eyeetiheryo ya etiini yeeyo muru aya woowiiva...ahiiso nikhwatta nowiiva naamwiivale aya vamuruni, masi owo aahikhalahiwa-tho mukumi, okhuma Rooma a epakawu khukhala Rooma a opaapa. Nto vano awo anrowa opaka elatarato ya yeeyo, ya nxeni ninkhuma mwa Wiisuupulula 13.

Mootoko oweha? Elapo ela evahiwe nummero muloko ni tthaaru, ni enkhumelela...Nkinihimya wira ela ti...Ti—ti yootikiniha, nnya, wira yaarowa wiiraneya mwa matemaatika, ma...oratta-ene voolikana ni Yolempwa. Emphwanyaneya kapiitulu 13 ya Wiisuupulula, elapo ela.

⁹³ Inama sothene sikina sinkhuma mmaasini, ekanle eyaattelo ni mittitthi s'atthu, Bibilia ohimmye awe; masi nxeni nla naamukhaani naakhumme elapo ya vathi, vaavo vahaakhanle atthu. Nnya, owo aari mwaapwittipwitthi, otaphuwa wa etiini; nuumala aalavunle ntoko ehanasi, ni aahiiraana ni owerya ni aahiira sothene ehanasi yiirale aya owo ohinatthi. Vekeekhai. Nto eyo eri vo. Eyo—eyo ehaana okhala siiso tu. Khiyaavo hata enamuna ekina yo osyaka.

⁹⁴ Nto hiyo nri va, olelo, nipakaka eyeetiheryo. Eyeetiheryo! Hiyo khaninwerya olipelela mpakha...Hiyo nineererya

owiiriha atthu othene okhala mu—Luteraano; nave khaniwenrye wira. Nimphavela owiiriha othene aya okhala aPatista; khaniwenrye wira. Othene okhala aMetotista, wala othene aPentekosite; khawenrye. Tivo, wira yiire yeela, okathi ti wookhuveyaxa, mpakha awo apanke aya mwaataano, muru, elatarato ya nxeni. Vekeekhai ti yeeyo awo yiirale aya. Nto exeeni iyo? Okhomeliwa wa Masu, emaara ekina, ori vakhiviru. Anoophukiwa ni vahilekenle onimoorwa vanlakani.

⁹⁵ Nwehe, Masu oowooniheriwa, ohiya muromolelo, animooniheriwa, Masu annivirikana ni muromolelo.

Exeeni ela, eyeettiheryo ela exeenii? Sateelite a oRooma. Bibilia ohimmye wira yaarowa okhala siiso? Ayo, mulopwana! Wiisuupulula 17, aahooniwa Rooma ovenya mwa eyeettiheryo ya enamukuttho, ya muthiyana. Muthiyana, ekereja okathi wothene enthoonyeriwa ni muthiyana.

Okhala wira, Mwaakameliwa a Kristu muthiyana. Hawa aari ole aamonre; owo ti Ole onrowa ovuluxiwa. Nto Ekereja (exeeni?) muthiyana onvuluxiwa.

⁹⁶ Nto muthiyan'ola aakilanthe vasulu va nxeni ni miru mithanu na miili. Ni hiyo ninnisuwela sa miyaako mithanu na miili, ni sikina, ntoko Bibilia sihimaly'awe wira yaamukhala. Khiwaavo ovonya. Khuwaavo oweryaneya wo ovonya. Munnona?

Ni nwehe nto, ninnoona, wira owo aari “MAI A ANAMARARUWA.” Munnona? Ni mai ni mwaana anniiraana-tho mwa opatthani. Vaavo, mwaana, aatonko awe omutthyawa maama, wira aphavele okhala vooloka, okhala wira ame awe yaari oomoraxa ni ootakhala mpakha mwali aakhumme awe owaani. Uh-huh. Masi vano, okhuma okathi opacenrye awe wunnuwaxa, owo, ni airaka itthu sinci-ene sootakhala, yoowo ene; owo oniwoona ame awe, owo onuupuwela wira ame awe yaahikhalana exariya, tivo owo ompakaawe eyeettiheryo awe yoowo. Munnona? Vekeekhai.

⁹⁷ Airaanihaka oPrustante, wa muromolelo, onnimaliherya voolikana ele Yoolempwa ehimmye aya mwa Wiisuupulula 17. “Othene, ale masina aya yahaalempwe Muliivuruni mw'Ekumi ya Mwaapwittipwitthi, yaari awawe.” Emosa wala ekina, wala nxeni wala elatarato ya nxeni. Bibilia ohimmye siiso.

Ni Yesu oolavula sa yeela, kahi ntoko komunismu. Masi mwa Matewu kapiitulu 24, opacerya versiikulu 21 mpakha 26, Owo aahihimya khalayi ene wira erooho mwa eyeettiheryo ela yaarowa okhala yoolattanaxa ni etthu y'ekeekhai mpakha yaarowaaya owoototha ale Oothanliwa vaakhanle wira vaaniweryaneya; ale Oothanliwa, yaawo Masin'aya aheliwe Muliivuruni mw'Ekumi ya Mwaapwittipwitthi ohinatthi opattuxiwa olumwenku. Ni, voohithepya, eyo ehaavitekelelaxa, mpakha Owo ohimmye awe wira ahaavukunle muteko, mwaha

wa yaawo, khiyaarowa okhala erutthu yaarowa woopowa elapo ya vathi. Ni hiyo nirina paahi. . .

⁹⁸ Ola ti—ola ti 64, kahi yeeyo? Ni kinuupuwela wira enihimmwa wira siri ntoko miyaakha muloko ni mithanu ni miili soovukuwa, tivo, voolikana ni ekalentaariyu. Ni niri 64, 1964, onrowa okhaliha (exeeni iyo?) miyaakha miloko miraru ni mithanu na mosa sihanle, wira ephiye eseekulu yanamiloko miili ni emosa.

Ni khula miyaakha ikonto piili, olumwenku onniphiyaka okhomoni wa eyeettiheryo aya ya molumwenkuni, eyeettiheryo ya etiini, mpakha omala iyeettiheryo sothene, ni Muluku aahaana okela-mo. Owo aahiira mahiku a Nowe; miyaakha ikonto piili soopacerya. Miyaakha ikonto piili saneili, eyeettiheryo etthikenle vaavo yoosoma ahu enihimyaya, voosiis'ula, nto Owo khuveleeliha-tho Masu Awe. Owo aaveleelinhe Masu Awe ni profeta, okathi wa Nowe, profeta Nowe; nto atthu khukhootta Yaawo, mwaha wa eyeettiheryo aya. Owo aahiveleeliha-tho Masu Awe okathi wa Yesu, Masu oowooniheriwa voomalela; atthu khukhootta Yaawo. Nto vano 1964, sihalaka miyaakha miloko miraru ni mithanu na mosa mpakha siphiiyerye-tho miyaakha ikonto piili voomalela; ni Masu aaruhiwa, ni eyeettiheryo yookhootta Yaawo.

⁹⁹ Moota xeeni nryaahu vakhiviru? Pooti vaxiye-ene ovikana sinuupuwelaahu, moone, wira okathi p'ukathi vaamuweryaneya wiiraneya. Khino chiiraneya, mpakha vansuwelaahu, ntoko silavunle aka Ettiminku yookiserya kaaryaaka vaava. Nsina nookiserya khino nookhala Muliivuruni mmo; nakhala-ru vale, khaninkhala-tho ninkela. Olumwenku onookelela ohoolo ntoko kweekwe, masi Ekereja enootheritiwa ekanyeryo. Nwehe vano nikelalaka ohoolo va. Masina aya, vano, owo khonrowa owoototha ale masina aya alempwe-mo.

¹⁰⁰ Exeeni iyo? Ehaana okhala eyeettiheryo. Munnona? Nto muupuwele paahi, wira mpannta wa muromolelo owo mwa eyeettiheryo eyo, muniira exeeni nto? Mwiirale-ni? Munooththitiwa ekanyeryo ota, moone, wa Masu, okela eyeettiheryo yoowiiva enkumiha, "Wooneyaka ntoko atthu oothunku, masi ekhoottaka Owerya waya nave." Eyo ekanyeryo ya nxeni. Vekeekhai. Munnona?

¹⁰¹ Nlo nxeni iwe, etthu nlo niirale aya; nto va eri elatarato, etthu emosaru. Nto nxeni naari nuulupalexa, naapanke aya ekereja eyo yuulupale ya mulaponi mothene oNicea, moone, awo yiirihale aya o—olumwenku wothene orwa wa yeeyo, eyeettiheryo yeeyo. Ni awo yuupuwela wira yaari yuulupale saana, "Khaavo aawerya owana ekhotto ni yaawo," ohimmye Bibilia, mpakha awo yaapakenle aya elatarato nxeni, ni khwaaruuha aPrustante othene muhina mwa Mwaataano wa Ikereja; yeeyo yaapanke eyeettiheryo, yeeyo nyuwo

mwahuupuweleliwanyu ntoko muKristu wala etthu ekina woohikhala wira mwiira mpantta wa eyeettiheryo yeeyo.

¹⁰² Vo ti vari evirikanelo ya ekanyeryo ya nxeni ni Ekanyeryo ya Muluku. Muluku onthhitta ekanyeryo ni Masu Awe. Munnaamini wira Masu ti yeeyo?

Vano nyuwo muniira, “Eyo ekeekhahi, Munna Branham?” Ayo, mulopwana.

¹⁰³ Vano, koosuwela wira nyuwo Anasaapatu, wala Ativentista a Seetimu tiya, muniira, “Osuka nihiku na Saapatu.” Masi eyo kehiyo. Kahi wira kikhale oolipa murima ni nyuwo, masi eyo ti yoohilempwa mara.

aEfeso 4:30, anihimya wira, “Muhiriipihe murima Erooho Yoowaarya ya Muluku, yeeyo mutthittiwaanyu ekanyeryo mpakha nihiku no woopoliwa wanyu.” Munnona?

¹⁰⁴ Vano, Erooho Yoowaarya ti Masu. Muluku kahiyo araru. Owo ti Muluku mmosaru mwa okathi miraru, miteko miraru. Muluku, Tithi, mwa ikano; Muluku, Mwaana, mwa mahala; ni Muluku, Erooho Yoowaarya, ntoko muniihanaanyu Yeeyo, Muluku mmosaru okathi wa Erooho Yoowaarya. Muluku, Tithi, aari Masu; Muluku, Mwaana, aari Masu; ni Muluku, Erooho Yoowaarya, ti Masu. Moone, iyo miteko miraru paahi. Ni o-... Nto Erooho Yoowaarya enimootthittani, tivo nyuwo muntthittiwa ekanyero ni Masu.

Vano nyuwo muniira, “Ahe, kootthittiwa ekanyeryo ni...”

¹⁰⁵ Ahe, nto, eniisuwanyeiha mmansaya. Munnona? Eyo ennooniherya. Khamukhanle wira mpantte wa eyeettiheryo, ni otthittiwa ekanyeryo ni eyeettiheryo ni Masu, moone, okhala wira ti yoovirikana, emosa ni ekina. Khimukhanle wiiraka. Vaareera.

Vano ninnoona, wira, mekaanika ya maakina maalupale, mekaanika ya maakina maalupale, yeeyo eri wira...

Maakina, ahaana...ekaaro, ehaana ipistawu, ivaavula, ekarpuratoore, ni sikina. Eyo e—eyo mekaanika.

¹⁰⁶ Kaatthuna kihimyeerye etthu Ekereja vaava, enikirweela mmuupuweloni, moone, ti yeeyo, kookupali wira hiyo nri vakhiviruxa wa woomalelani, ki—kinrowa ohimya etthu vano, moone, moone, me—mekaanika, aakhala atthu anci-ene aneererya oleeliherya mekaanika nave ahisuwelaka. Munnona? Etthu emosa paahi nyuwo...Ni, moosuwela, mwaahaana osuwela. Mekaanika enoosuweliwa. Vano ankhi Moise...

Ankhi aakhanle mutthu iirale, “Nowe, kintthuna wira muleeliherye me—mekaanika ya moota ekalawa enlenleyaaya. Moota e...” Owo khaawerya wira.

Khamurina osuwelaka mekaanika; Etinaamika aya paahi. Moone, Etinaamika t’ile muntthunanyu osuwela.

“Sayi?” Ahe, mutthu aarwiiye-ru wIsarayeli, khwira, “Eyi, Moise, kintthuna kisuwele saana. Mwaawenrye sayi opattuxa inama ni nuulumo nanyu yeenyu?”

¹⁰⁷ Owo aamwiira—owo aamwiira, “Nlo khanihiyo nuulumo naka. Awo Masu a Muluku. Owo okileenle wira kiire.” Munnona?

¹⁰⁸ “Miyo—miyo—miyo... Mukileele, mukileeliherye moota mwaaruhenle anyu iphepele mulaponi, okathi yahaakhanle-aya hata emosa, iphepele sinci-ene mulaponi.” Munnona? Moise mwaneene, khaawerya oleeliherya eyo. Nyuwo khamurina wiiraka. “Mwiirinhe sayi ettheke ya onikhuma nsuwa orwa ni ovekhulela ni ohula ephaka ovira Ephareya Yooxeerya, ni hiyo othene khootttharani mutthayani moowuuma. Muleeliherye mekaanika ya yeeyo. Exeeni—exeeni—exeeni yaari e—e—eyeettiheryo nyuwo mwaarumenle anyu, Moise? Exeeni? Mukileele othokosa wa siyensiya ya aatomu mwaamutaphunle anyu.” Munnona? Munnona?

¹⁰⁹ Owo khaasuwela. Owo, ahe, owo khaasuwela emekaanika; owo aasuwele etinaamika paahi. Ni—ni ti siiso.

Nkinwerya wooleelani moota kinkhalaaka mukumi. Nkinwerya wooleelani moota munkhalaanyu mukumi, masi munkhala mukumi. Nkinwerya osuwela moota murima anyu, ni yolya anyu siniwananaaya ni opaka ephome. Ni sintthuneya i—ikuru sa yolya eyo, ni—ni enoovira exiri yaneeraru ya nrupe na nipwiiipwi ni orukunxa okhala ekumi y’ephome, ni oveleeliha ovira mwa nyuwo. Miyo—miyo nkinwerya oleeliherya eyo, masi eyo enniira. Moone, eyo enniira. Miyo—miyo nkinwerya oleeliherya eyo. Nkisuwenle emekaanika aya. Ti etinaamika.

¹¹⁰ Vano, Moise khino aanisuwela emekaanika, masi khuwaari mwaha wa mutthu mukina osuwela saana woohikhala Moise. Awo yaasuwela wira yaanivara muteko, ni eyo yaanaaphiyerya. Xeeni atthu ohiweryaka okhala oosivelihiwa siiso olelo? Munnona? Atthu othene khiyaakhanle okhalaka Moise. Aari Moise mmosa paahi. Awo yaasuwela paahi wira yaari ya Muluku. Yaahoonu wira yaari ya Muluku.

Ni awo yaahitthara ni yaahaareerela mpakha vapacenryaya ohoverya, khutthuna onvenxa mutthu mukina wira apake etthu emosaru, Kore, Datani. Nto okathi amphwannye aya mutthu wira akelihe mitakiheryo sa mw’erutthuni, vookiserya Muluku iirale, “Mwiivalaanihe. Muhikele eyeettiheryo eyo ya mutthenkeso. Moone, mukhume-mo! Kinrowa opwetexa.” Vano Owo aahihula etthaya khwaamirya. Munnona?

¹¹¹ Khamunsuwela, khamurina osuwelaka emekaanika. Musuwele etinaamika paahi, etthu ensukhuma, enkhalihha ekeekhai, ni moone sintoko enniphiiyerya exeko Bibilia olaihenryawe wira yaamphiiyerya nihiku nla. Moone, awo Masu emaara ekina, otthikela Masu.

¹¹² Vano, maakina maalupale animwiikhaliha vano, ni oolikana wira yeette. Mekaanika eri vale. Awo aakhalana eyeettiheryo ya mekaanika ya mutthenkeso enrowa oruuha, “murettele,” elapo ya vathi, awo annihimya. Awo aakhalana...ntoko NU.

Ilapo sihiiraana. Ola okathi wo wiiraana. Miyo kinoomalaru olaleya yeeyo, naanaano. A...Awo animwiiraana, wira eruuhe exeeni? Murettele wa mulaponi. Awo yiirale mwa Mwaataano wa Ilapo. Awo kweekwe anniiraka, nave khenavareke muteko. Khivanweryaneya ovara muteko. NU kahi etthu woohikhala epalawu yuulupale ya mphira enkuxiwa ni etheku ya mwiixuttiho wa khula elapo. Enoophuleya ni enoophutuwela khula etthu. Khekhanle ovaraka muteko.

Nnakhala Mwaataano wa Ikereja khokhanle ovaraka muteko. Owo mutthenkeso wa atthu, voovirikana ni eyeettiheryo...ahiiso ni eyeettiheryo aya yoovirikana ni Masu a Muluku, ni khekhanle ovaraka muteko. “Vanweryaneya sayi aili weetta vamosa ehiiwananaka?” Khivanweryaneya. Ni enweryaneya sayi ekereja y’eKristu, ehaana...

¹¹³ A—aPentekosite, Asempeleya a Muluku, ni i—ikereja suulupale sikina sa—sa omwene wa Pentekosite, ni s’atthu a Ehapari yooreera Yoomalela, awo akhanle ohiyaka sayi miixuttiho saya sa ehapari yooreera, malamulo ene yaawo yeemerernye aya? Ni okhalaka wira aavenxiwa wira ekhume mmitthenkesoni mmo ni wira epwapwele; ni awo ahaana ohiya mwiixuttiho aya wa ehapari yooreera, wira yeetteke n’atthu ahiniiraana mwa ikano sa Bibilia, ni Ovonihwa wa Muluku, ni Owerya wa Muluku, ni Yesu Kristu. “Vanweryaneya sayi aili weetta vamosa ehiiwananaka?”

¹¹⁴ Eyo eri vo, owo p’ukathi hiyo oophiyale ahu, ni awo ti maakina maalupale akhalihwe. Vano awo aakhalana mekaanika. Etthu emosa paahi awo enaahalela okhalana ti Satana mmwe, ni tinaamika, wira ekhanyererye ekanyeryo ya nxeni. Eyo yakhanyereriwa-ru, nto etinaamika enoovara muteko. Mekaanika eri vale. Awo aakhalana.

¹¹⁵ Kitthuniheriwe kihimye etthu, nave; okathi ula wo wiiraana, woona ikereja siiraanaka, ilapo siiraanaka. Ni, okathi wo wiiraana wa Muluku ni Mwaakameliwa Awe. Ni miyo kinihimya ela ni nlemeliho ni nttittimiho. Kinnaamini wira Mwaakameliwa a Kristu ohitthaniwa. Kinnaamini wira Owo ootthittiwa ekanyeryo Momweneni mwa Muluku. Kinnaamini wira yookhala emekaanika. Awo anwehererya Etinaamika enrowa omukumiha Owo mulaponi, orowa Movuwani, Mookuxiwani. Miyo kinnaamini ni murim’aka wothene. Ayo, mulopwana. Hiyo khanisuwenle moota Owo onrowaawe wira, masi Owo onimwiira.

Owo ti Etinaamika. Hiyo ninkhala paahi mamempuru a maakina, a Erutthu Awe, nikhalaka oolikana ni Yoowo, ni

omoono Owo airaanaka ni hiyo, mwa miteko Sawe, ni soovaha Sawe sa mphento, okathi Owo onninnyaawe okathi vakhani nihinatthi Niira n'Othela. Nto hiyo ninoolipelela, niwehereryaka yeeyo.

Ekerej'aya yuulupale enimwiiraana.

¹¹⁶ Etinaamika ya Ekerej'ela enrowa okhala osariha-tho wa Erooho Yoowaarya wira hiyo noovara muteko mwa mphimo mukhaani okathi Nluku noomaliherya ninkhuruwaaya wira niiraane ni Erutthu. Masi okathi Muru owo ni Erutthu siniiraanaya, owerya woomalela wa Erooho Yoowaarya enoonvenxa Owo voolikana siiso; ni alipa-ookhwa, akhwiye mwa Kristu, mwa miyaakha imiya sene sivinre, anoorowa ovenya mwa oreera wa owaarya Wawe, ni anoovava orowa osulu. Etinaamika ti Erooho Yoowaarya.

¹¹⁷ Nto vano etinaamika ya eyeettiheryo ela yuulupale awo apanke aya, maakina ala maalupale anoovara muteko nihiku nlo muhina mwa mwaataano wo wiiraana wa Mwaataano wa Ikereja sa Mulaponi mothene, yeeyo enrowa okhanyererya, nave. Muupu- . . . masi muupuwele . . .

Nyuwo muniira, "Eyo yakhumelela-ru . . ." Onrowa wira vaxiye-ene wa nyuwo. Muniira muri muhina. Hata mutthunaka, wala nnari, muniira mukenle-ene. Munnona? Nwehe, muniira murina erooho eyo mwa nyuwo.

¹¹⁸ Nihiku okathi i—okathi i—ittheke sa Erooho sinrumaaya okhuma onkhuma nsuwa, onkela ephoyo, onkela nsuwa, ni okuusini, yaakhanyereryaka athu okhuma mwa yeeyo, ni ewoonihaka athu!

Mwaha wa yeeyo miyo kikhanlyaka oovirikanyaxa eyeettiheryo eyo. Miyo kaahoona wira yaahikhala etthu vale, epiphi. Ntoko saawoonale aka athiyana ale enamuna yoottale aya itthu iyo wiitho waya, ntoko sooleenle-akani Ettiminku evinre, kaanisuwela wira yaahikhala etthu jaarwa.

¹¹⁹ Xeeni kweekwe kaakhanle aka oovirikanya itthu iyo? Nkaasuwenle; Koosuwa vano. Xeeni miyo kweekwe kaakhanle aka nthowa ni etiini yootthokihiwa? Okhala wira (kinnoona vano) eyo ekanyeryo ya nxeni. Munnona? Miyo nkinatoko ohimya eyo mpakha isumana piili sookiserya. Munnona?

Vano, nuumala ipoliitika sa ekereja, vano exeeni eniiraneya? Vammalaya olipihiriwa vekeekhai? Vano, nwehe, vookiserya yoophiyerya nipuro varinaaya okhala mwiiwanano. Mweettelo aya woottharelana vano waari . . .

¹²⁰ T'uvi waari mweettelo woottharelana wa aYuta nuumala ekereja omukhootta? Ekereja yaakhoottale Masu. Awo khiyaatthuna okhalana naata ni Yaawo. "Yaari erooho yootakhala." Eyo yaanisuwela miyuupuwelo saari mmurimani mwaya. "Yaari yootakhala." Enaamwi, yaari Masu. Miteko Owo

ovanre awe, saahimukhalela onamoona Yoowo, saahilipiherya Ole Owo aaryaawe. Awo khayaatthuna okhala nnaata ni Yeeyo.

Vano, yoothharelana, emphiya wa kuveerunu. Nto ola kuveerunu a ekereja, okhala wira ilapo sothene siri mpuwa. Iwe yaari elapo y'epakawu yeettiheryaka elapo ya etiini. Vano, etthu yothene etiinii, tivo ehaana orweela etiini ya molumwenkuni.

Oh, wulu, mutthu oohoona aamuwerya woona eyo! Nto mutthu oohoona onihimya exeeni okathi onooonaawe yeela? Okathi onooonaawe, owo onookhuma mwa ohoona wawe.

¹²¹ Nwehe iwe okathi mwaataano ola wa mulaponi oniitakanyaya, "Ninrowa omwiiriha exeeni Yesu ola oniihaniwa Kristu?" Awo vekeekhai khandthuna okhala nnaata ni Yeeyo. Vano enihala etthu emosa paahi yo wira, nto, tthiri yeeyo awo yiiralyaya okathi ole, awo anookhomela Eyo, vekeekhai, anoomaaliha. "Eyo ehikhaleke-tho. Khenrowa otthuniheriwa wira." Owerya wa etiini wa ilapo khunrowa otthuniheriya-tho wira. Muteko mmosa ole oniiraneya va, n'itthu siiso, onoovuvuriwa mara. Khamunrowa owerya wira muhitthuniheriwe okhuma nipuro nuulupale, muru wa ekereja, moone, elatarato ya nxeni. Oh! Hiyo nri va, ti yeeyo tu. Hiyo—hiyo—hiyo noophiya.

Ni tthiri woolipiheriwa; mweettelo woottharelana omukhomela Yoowo.

¹²² Voolikana ni vano, ewiirihaka othene ale ahintakanyana ni yaawo, anrowa omaalihiwa ni khandthuna otthuniheriwa olaleya, moone. Siiso anookhomela, emaara ekina, Masu oolipiheriwa a natiri. Animweemexa, "Khamunthuniheriwa okhalana-tho eyo. Ohikhala-tho miteko so ovoniha. Ohikhala-tho waavekelela aretta. Nnari, mulopwana! Khamunrowa owerya wira. Nnari, hata emosa wa seiya. Nnari, mulopwana! Nyuwo munrowa orwaaka ovira Mwaataano wa Ikereja ahiiso khamunrowa okhalana etthu."

¹²³ Vano munoowerya woona mwaha wa xeeni kikhalelenyaaka oovirikanya etiini ya muromolelo, okhala wira ti ekanyeryo ya nxeni. Rooma ti muru aya, yoopacerya. Eyo ekeekhai voolikana. Ni eniwiiriha othene waakhela mwaha wo wiitakaniha ni aana, akhanle elatarato. Mai a yothene eyo, iirale etthu emosaru. Rooma iitthokihale yayi toko? T'ivi yaari etiini yoopacerya yoothokihiwa mulaponi? Katolika y'oRooma. Ookhala mutthu orina nuulumo nnihimya wira kahi siiso, kaatthuna kisuwele. Khanikhanle va. Mutthenkeso woopacerya, ekereja yoopacerya etonko wiitthokihi, waari oNicea, Rooma. Ayo, mulopwana. Ni vekeekhai ti yeeyo awo yiiralyaya.

¹²⁴ Nto Lutero iirale exeeni nuumala okhwa? Awo yiirale etthu emosaru awo yiiralyaya oNicea, Rooma. Awo yiirale exeeni nuumala Wesley? Awo yiirale exeeni nuumala miyeettelo sothene suulupale sikhumelenle? Awo yiirale etthu emosaru, ampakenle

aana axithiyana namuttompe, voolikana. Ntoko, voolikana, hiyo ninnoona va . . .

¹²⁵ Kaahikhalana Yoolempwa emosa yaamukhaani yaalempwe va. Khino vanreerela kihiye yeeyo. Masi, nto nwehe, awo yaarina . . .

Othhokihwiwa wa ekereja wooruaha eyeettiheryo emosaru olelo. Etthu emosa paahi awo antthunaaya etinaamika ya yeeyo, etthu emosa wira apcerihe ovara muteko. Ni enoophiyerya woonihiriwa, vahilekenle.

¹²⁶ Ekereja Katolika ni ikereja Prustante sinrowa okhala apatthani. Miyo kihooleelani eyo okhuma—okhuma khalayi, mwa miyaakha miloko miraru n'itthu sookiserya. Awo animwiiraana. Ni nyuwo munnoona oratta-ene etthu aniiraaya vano. Mu—muPrustante khonkhalakhala okhalaka muKatolika, masi onrowa okhala oxinna wo opatthana, ekanyeryo ya nxeni, yoolikana ni nxeni.

¹²⁷ Enamuna emosaru ni maama, Hawa, ohononne olumwenku wothene wa okhwa w'erutthu. Maama, Hawa! Nwiriyaane. Maama Hawa oohonona nloko nothene n'atthu, ni okhwa w'erutthu, (sayi?) mwaha wo okhoota Masu khukupali etthu yohalela olikana ni Yaawo. Owo ooruuha okhwa wothene w'erutthu mwaha wo wira aaroohiya Masu eekeekhai, khwaamini Masu eekeekhai othene ohiya etthu ekhaani paahi. Ohiiraana vakhani ni Masu a Muluku othene wooruaha khula owereya murima, okhwa wothene ni itthu sothene sitonko okhala mulaponi. Hawa ooruhela eyo, mai a okhwa. Vano munnoona vamphiyaahu? Mai a okhwa, nwehe, owo aaroohaamini Masu paahi.

Owo iirale, “Muluku ohimnye wira . . .”

Satana khwira, “Ti yeeyo.”

“Muluku ohimnye wira . . .”

“Ti yeeyo.”

“Muluku ohimnye wira . . .”

“Ti yeeyo.”

“Muluku ohimnye wira . . .”

¹²⁸ “Ayo, yeeyo, eyo ti yoolikana. Mwa—mwa enamuna khata, ti yeeyo, masi, moone, eyo—eyo—eyo kahi yothene ya Yeeyo. Moone, mai—maitho anyu anootthukuwa, nyuwo munookhala . . .”

Masi Muluku oohimya, nto eyo enimaliha mwaha, Masu! Moone, eyo epacenrye ni ophuleliwa voohiloka vakhani paahi wa Masu, ni, etthu emosaru, emmalela enamuna emosaru.

¹²⁹ Nwehe, mwaana muthiyana muhokorokho wa maama ni tiithi, mwaha wo ophitaana. Vano va yookhala etthu yootutuxa. Masi okhwa, w'erutthu, okhwa w'erutthu ophitaana wa maama Hawa ni Satana, vamosa, mwaha wo ohaamini Masu a

Muluku. Awo yaaroophitaana khuruuha mu—muhokorokho wa mookhwaani. Owo, e... Okhwa muhokorokho wo ophitaana Satana ni Hawa, vamosa.

¹³⁰ Hawa aarina Masu. Satana t'ovirikanya Masu. Ni, nwehe, oophiyaka miloko mithanu na mixexe ni thanu na xexe ni ipantte ya emiya ya miloko mithanu na mixexe ni thanu na xexe ya Yaawo, Satana aahikupali wira yaari oolikana. "Oolattanaxa," Bibilia ohimye wira, "mahiku ookiserya, yaamuwoototha ale Oothanliwa vaakhanle wira vaaniweryaneya." Munnoona moota enkelaaya, moota kweekwe enkhalakaaya, moota enrowaaya omalela? Enamuna emosaru, oowiiraana wa ohaamini Masu othene a Muluku. Moovara? Ti yeeyo eruuhale okhwa, otakanxa ohaamini ni Masu. Ohaamini, vakhani paahi, epantte ekhaani; epantte, yaamukhaanixa, saana, epantte ya emiya ya epurseto emosa. Masi ehaana okhala ipursentu emiya! Ti yeeyo tu.

¹³¹ Nwehe, mwaana muthiyana a Muluku, Ekereja, Mwaakameliwa, ni owo muhokorokho, wa Muluku ni Masu Awe, ephitaanaka. Erooho Yoowaarya ephitaanaka mw'erutthuni ya ethayi, Eyo yaahimukumiherya Mwaana a Muluku, muhokorokho wa exariya ya Muluku. Ni nihiku nookiserya, ntoko sinihimeeriwahu, "ntoko saaryaya mahiku a oSotoma," mwaakameliwa onrowa ophitaana ni Masu a Muluku owooniheriwa mw'erutthuni, Erooho Yoowaarya yaatthittaka ekanyeryo mwa Muluku, ni etthittaka ota ohaamini, epantte ya ota.

¹³² Ntoko sihimye aka, ekumi ya Beethoven yaari mwa nyuwo, mwaarowa okhalaka ntoko Beethoven; ekumi ya Hitler yaari mwa nyuwo, mwaamukhala ntoko Hitler. Ni Ekumi ya Kristu yakhala mwa nyuwo, nyuwo munookhala ntoko Kristu, ni munoovara miteko sa Kristu. Ni enookhala siiso. Kristu aakhanle olelo, Owo anvara voolikana ele Masu ahimye aya wira Owo aamwiira olelo. Ni Masu ahimye wira, "Owo mmosaru nsana, olelo, ni mahiku othene." Olumwenku ola woohoonu wa enamukuttho ohinweryela-ni woona okathi awo ankhalaya? Munnona?

¹³³ Hawa oruuhale okhwa wothene w'erutthu, mwaha wo wehererya okeliha ovirikanya wa Satana Mmasuni. Ni eyo etthu emosaru ekhumelenle ni ekereja, oNicea, Rooma, mwaha wo okupali makano ohiya Masu. Eyo etthu emosaru mwa aMetotista, aPatista, aPrespiteriyaano, okathi Waarya onkhumaaya mwa khula okathi nto awo anookhoota Owo.

Mwaha wa yeeyo aLuteraano akhwiyaaya okathi Wesley okhumelenle awe. Waari okathi mukina. Masu yaahikhuma, nto awo yaahaana okupali Yaawo ahiiso okhwa. Mwaha wa yeeyo aPentekosite ankhwaaya vano, okhala wira okathi ori va. Masu ahooniheriwa, okathi wa xawawe, okathi wa Masu othika, "ohokoloxerya Waamini w'axitiithi, otthikela wa aana." Ni awo

ari oowiiraanaxa, mpakha ankhoottaya Yaawo, ni kahiyo etthu woohikhala okhwa wa muroohon. Kweekwe. . .

¹³⁴ Erutthu ya Muluku, yoophitaana ntoko Mwaakameliwa Awe, akhalaka Mmosaru; Owo ni Kristu, vamosa, ti Erooho envara muteko mw'erutthuni ya Ekereja ntoko Eyo yaavanre aya muteko mw'erutthuni mwa Yesu Kristu, okhala wira Eyo epanthe ya Erutthu Awe. Kahi aili; masi Mmosa! Awo ari Mmosaru. Iya ni mwaara kahiyo-tho aili, masi mmosa. Ni Kristu ni Erutthu Awe ari Mmosaru. Nto Erooho emosaru yaari mwa Kristu eri mwa Mwaakameliwa Awe, mw'Erutthuni mw'Awe, eniwiiraaniha Awo vamosa ni Masu othene. Ni Muluku akhalaka mwemmo, Mmansawe, ooniheryaka.

¹³⁵ Nto nwanani a Kristu, onrowa wira, "Oh, miyo kinnimwaamini Kristu, kinnaamini Ehapari yooreera, miyo kinnaamini Itthu iya, masi, moosuwela. . ." Eyo vo. "Masi, moosuwela, mahiku a miiriya aavira. Khekhanle etthu ene eyo, moone." Eyo vo. "Oh, nkinaamini wira muhaana opatisiwa ni Nsina na Yesu Kristu."

¹³⁶ Masi Bibilia ohimnye siiso. Vano kintthuna wira teyooloku avaanyihe yeeyo. Munnona? Munnona? Ehaana okhala siiso. Nyuwo muniira, "Ahe, opatiiso khonvirikanaxa." Ahe, nto, xeeni okelaka olempwa? Xeeni yaakhanle aya yoomucala Paulo? Xeeni waakhalenle aya woowaacala othene akina? Nyuwo mumpatisiwa ahiiso. . .

Bibilia ohimnye wira, "Mookhalana nsina wira mwa mukumi, nave muhookhwa," okhala wira khanivo nsina nikina nivaheriwe vathi v'Erimu.

Xeeni nyuwo olaleyaka mwa Nenlo, ovekelaka mwa Nenlo, sothene sikina, masi, mwaphiya vatankini, munookhotta? Uh-huh. Munnona?

Miyo kaahimuleela mulopwana mmosa nihiku nlo, kiirale, "Ankhi mulopwana. . ."

Owo khwira, "Khivanvirikana hata vakhani."

¹³⁷ Miyo khwira, "Mulopwana aarwiiye wa nyuwo, nto khuhimya wira owo opatisiwe mwa nsina na 'Ethutu ya Saroni, Ekhekowa ya Mukhatoni, ni Ettheneeri y'Oxaka,' mwaamuhimya wira ti voolikana?"

Owo khwira, "Nnari, mulopwana."

Miyo khwira, "Mwaamumpatisa-tho?"

"Ayo."

Miyo khwira, "Mwaarowa ompatisa sayi?"

Khwira, "Mwa nsina na 'Tithi, Mwaana, ni Erooho Yoowaarya."

¹³⁸ Miyo khwira, "Vaareera, vano nyuwo mwiirale siiso, muhenle. . . Nyuwo mwaromola 'masina' awo, mwiirale etthu

emosaru owo iiralyawe okathi ohimme awe, 'Ethutu ya Saroni, Ekhokowa ya Mukhatoni, ni Ettheneeri y'Oxaka,' okhala wira eyo etiitulu, ni 'Tithi, Mwaana, ni Erooho Yoowaarya' etiitulu." Munnona?

Owo khwira, "Masi Yesu ohimnye wira mpatise, 'Nsina.'"

¹³⁹ Miyo khwira, "Vekeekhai eyo t'ile Owo otthunne awe wira yiiriwe. Masi etthu, kahi—kahi, Owo khohimnye wira, 'Mwa moolumo ala.' 'Mwaapatise mwa *Nsina*,' Nsina!" Oh, wulu! Miyo khwira, "'Tithi, Mwaana, ni Erooho Yoowaarya' itiitulu. 'Nsina n'Atithi, Mwaana. . . Nsina n'Atithi, Mwaana, ni Erooho Yoowaarya.' Munnona?" Miyo khwira, "Petru ohimnye wira Eyo yaari exeeni? Akina aya yaahimnye wira Eyo yaari exeeni? Munnona? Exeeni Iyo? Uh-huh. 'Pwiya Yesu Kristu' ti Nsina na 'Tithi, Mwaana, ni Erooho Yoowaarya.'" Owo ohaana vano atthu oophiyaka ikonto miloko miraru a elapo yeeyo wira aapatise-tho. Munnona? Vaareera. Masi ti yeeyo. Paulo ohimnye wira, "Nakhala Nlaikha ninkhuma Wirimu. . ."

¹⁴⁰ Paulo aahaaleela atthu ale yahaapatisiwe mwa Nsina na Yesu Kristu, Miteko 19:5, wira, wira yaakhele Erooho Yoowaarya, yaahaana orwa. Anamwi yaakhuwela ni omuttottopela Muluku, ni yiiraka itthu suulupale, owo khwira wira awo yaahaana otthika ni opatisiwa-tho, mwa Nsina na Yesu Kristu. Vaamanlyawe Yohani Mpatisa waapatisa, awo yaahaana otthika ni opatisiwa-tho.

Ni owo oohimya, mwa aKalasiya 1:8, "Nakhala Nlaikha ninkhuma Wirimu niniixuttiha etthu ekina ohiya ele miyo kiwiixuttihalyakani, nitakhaliwe." Ayo, mulopwana. Tivo nihaana okhala oratta-ene ni Masu awo, khula Nuulumo na Yaawo. Munnona?

¹⁴¹ Nwehe. Oh, kharina soovonya; mukhale oolipa mara. Yaakhanle-ene etthu yoohoverya mmuruni mwanyu, vanreerela mookolele naanaano va. Muhilipelele mpakha okathi yoowo, onrowa okhala vaxiye-ene saana. Muhilipelele mpakha waakhela ekanyeryo voowiixeryaxa vahinrowaanyu-tho woona, munookhala oohoona.

Owo aahimukhaliha oohoona Isarayeli, wira awerye wooniherya Masu Awe. Owo oniwiirela etthu emosaru Amalapo, okhala wira va—va awo aneetta elukamaka mwemmo ntoko awo siiralyaya okathi ule.

¹⁴² Nwehe, Hawa aarookhootta ni khuvaha ihakhi sawe. Vaamanlyawe woona Masu olipiheriwa ni Muluku, etthu Owo iiralyawe, owo aahikhootta Yaawo khuvaha ihakhi sawe. Etthu emosaru awo yiiralyaya oNicea, Rooma. Ni etthu emosaru awo aniiraaya vano Mmwaatanoni wa Ikereja, vekeekhai. Axinna, eri vale, okhuma Maphattuwelo mpakha Wiisuupulula, etthu emosaru. Ti yeeyo Isarayeli iiralyawe. Ti yeeyo Pilato iralyawe. Eyo t'ile etthu yothene yiiralyaya, kweekwe, okhuma

Hawa mpakha vano, etthu emosaru. Awo anookhootta Masu oolipiheriwa ni okupali nikano, vooranteliha. Eyo ennikhaliha okhwa, okhwa wa muroohoni.

Ookhwa! Masu nlelo anlaleeriwa alipa-ookhwa. Voolikana-ene! Khenrowa okhala siiso oMileenyuni, vano, moone. Awo—awo, aalaleeriwa. Khino animwaakhela naanaano va. Munnona?

¹⁴³ Aana a Kayini, yaawo yaari muhokorokho wa ohaamini Masu a Muluku, aana a Kayini yaahinyemula mutthaka wa profeta Nowe. Moowehe yeeyo? Ni Masu a Muluku owo aahiruwa o—ohukhummwa wahimmwe, ni aahikhalana ithoonyeryo sikumi, ithoonyeryo soolipiheriwa wira okathi waari wookiseryani, nto aana a Kayini khunyemulasa.

Siiso ntoko awo siniiraaya vano. Siiso, eyo, awo yiirale-aya nihiku na Yesu. Siiso awo yaahiira mwa wakathi sothene. Kweekwe enkhalaka siiso. Awo anoonyemula ni otheya Yaawo. Owo iirale, “Mahiku ookiserya anookhumelela anamanyemula, yiiraka, ‘Khivo evirikanne mwa okathi, okhuma okathi axitiithi ahu arumpe aya.’” Munnona?

¹⁴⁴ Ni aana a xetwani, mwa eyeettiheryo ya etiini, mwa Masu oowooniheriwa okathi wa Yesu Kristu. Nkawehani, iyeettiheryo s’etiini s’atthu aYuta, (Munna Rose), atthu aYuta yaatthuneya wira esuwenle oratta-ene, masi eyeettiheryo aya yaahiwiiraha ookhootta ni onyemula Masu a Muluku (awo yaahimyaaya wira yaanaamini) owooniheriwa, nnakhala Nuulumo nimosa noovonya. Awo yiirale etthu emosaru.

¹⁴⁵ Voolikana siniiraya olelo. Eyeettiheryo ya etiini mwa maakina ala maalupale awo arinaaya ookhalahiwa vano, mara, anaakhootta anatiri okathi wa woomalelani; ni Mutthaka w’okathi wa woomalelani, ni ethoonyeryo ya okathi wa woomalelani, sothene sa okathi wa woomalelani sirina okhala, ntoko Muluku aahimye awe khalayi ene, Nuulumo Nnuulumo.

Eri mufiitani. Awo—awo yakoopela, wala etthu p’itthu khino akhanle aya wiiraka, awo khanrowa nnakhala weemexa Mutthak’owo! Munnona? Onookelela ohoolo mwa inamuna sothene. Munnona? Wookhuma. Wookaravariwa. Wookhuma. Munnona? Awo khiyaakhalakhala eweryaka. . . Awo—Awo Masu a woomalelani, naanaano va. Per-. . . Oolipiheriwa woomalela ni oowooniheriwa, imaara ni imaara ni imaara sene, ni ithoonyeryo, mitikiniho, mekaanika, ni—ni—ni Tinaamika, ni—ni siyensiya, ni ekereja, ni Muluku Mwaneene, ohooniherya wira ti ewoora; nave-tho ni Masu, ni ithoonyeryo ni mitikiniho.

¹⁴⁶ Mutthaka wookupaliwa wa Muluku eriyari anyu, ni ithoonyeryo ni mitikiniho sa ewoora. Mutthaka mmosa wira Yesu Kristu khokhwiye, masi akhalaka siiso ntoko Owo otonko awe okhala, ni omwareyaka. Ni eyo vekeekhai ennimmaliherya Malakhiya 4 ni Soolempwa sothene sikina Yesu ohimye awe wira saamukhala mahiku ookiserya, soomaliheriwa voomalela,

siiso ni siyensiya, ni olumwenku. Ni irevista sookumiherya ilatarato suulupale mattheke a Waarya, saahimmwe vaava. Malaikha a Muluku, akhurunwe, awo ahinsuwelaaya hat'etthu ya yaawo. Ni mapuro othene, mapuro othene, ehoniheriwa, mulaponi mothene!

¹⁴⁷ Voottharana okhomeliwa, ni ninniweha. Ntoko Yesu sihimmye awe, “Kihimyeke exeeni, ‘Koopoleni, Tithi, ewoora ela’? Masi, nnari. Otthuna Wanyu wiireye, moone, vathi, ntoko Wirimu.”

¹⁴⁸ Ti yeeyo Ekereja enihimyaya, olelo, mmurimani mwaya, “Miyo wiitakaniha n’itthu...? Nnari, Pwiya, nnari. Otthuna Wanyu wiireye, ntoko Wirimu.”

¹⁴⁹ Nwehe, nuumala olipihiriwa Masu oolaiheriwa a okathi, awo yaahikhootta. Awo yiirale etthu emosaru olelo. Ni vano miyo kinihala omaliha. Ni okathi Owo saarwiiye awe okathi ole aisuwanyehaka voowooneya Mmansawe okhala Masu, ni khuphiya mwa woonihiriwa vaavo awo yaarinaaya othanla Masu ahiiso okupali eyeettiheryo; yoophiyerya etthu emosaru olelo, ahaana othanla Masu ahiiso okuplai eyeettiheryo. Nto awo akupanli eyeettiheryo. Vano eyo eniira exeeni? Kimalihaka. Owo ori mmatatani mwa olumwenku. Ekeekhai.

¹⁵⁰ Vano, yoosoma aka. Eyo ti yoorakamaya wira ekhalihe mulipiheryo, masi vano kinoopacerya-ru, moone. Muhivenye, koopa iperwa paahi. Nkawehani, va eri yoosoma aka. Hiyo noosuwela eyo. Eyo yaari wii kihele mulipiheryo. Nirina yothene yooheliwa eliinya emosa va vano. Nrowe nilukame mwaha ene noone moota eryaaya, nihele vathi va eluupa.

¹⁵¹ Yesu ori mmatatani mw’atthu. Ori mmatatani mwa ekereja. Munrowa omwiiriha exeeni Yesu ola oniihaniwa Masu oottikittheliwa? *Kristu* enihimya “Masu oottikittheliwa.” Munnona?

“Munrowa omwiiriha exeeni Yesu ola?” Pilato aahihimya. “Kimwiirhe exeeni Owo? Exeeni, mweettelo aka t’uvi? Kimwirihe exeeni Yesu ula oniihaniwa *Kristu*?”

¹⁵² Olumwenku waavekenle-ni? Ekereja yaavekenle-ni? “Mmukhomele! Amaalihiwe! Hiyo khanimmutthuna-to Owo.”

¹⁵³ Kinrowa wookohani etthu emosa. Munniwerya otthokelela ottheka mmatatani mwa Oswald, voosiis’ula, ole omwiivale Mukhulupale? Munniwerya otthokelela ole onrowa okhala ophukiwa wawe yoonihiriwa-ru wira ti yoowo iirale? Munniwerya—mwaamuwerya otthokelela wira waamukhala omoreliwa ikharari yoowo? Ephome ya Mukhulupale a Estadu Unidu eri mmatatani mwawe. Munuupuwela wira Epwaro Feteraale... Voohicala moota xeeni owo aarowaawe oxonttela, “Nkaalakenle wira,” eyo khenrowa omukumiha mulattu hata vakhani. Owo onoopweteya. Mwaha wa xeeni? Owo orina ephome ya Mukhulupale mmatatani mwawe. Mwaamuwerya

othhokelela miyoonelo sawe? Mwaamutthuna yeeyo mmatatani mwanyu? [Muthukumano oniira, “Nnari.”—Mol.]

¹⁵⁴ Ahe, ankhi Ephome ya Yesu Kristu nto? Munuupuwela wira munookhala oohihimyaniwa mulattu, Eyo emanle-ene olipiheriwa voomalela? Munrowa otthyawa sayi Yeeyo? Ephome Awe eri mmatatani mwanyu, oottheka! Natampi, munrowa vayi mwakhuma va? Munrowa wira exeeni nuumala muthukumano voosiis’ula?

¹⁵⁵ Nyuwo munuupuwela, nyuwo muniira, “Ahe, miyo kaatthuna...Miyo nkaalakenle okhala ootakhala.” Oswald khino aarowa ohimya siiso.

Vakhala wira exariya ya Epwaro ahu Yuulupale ya milattu envekela exariya, enoovekela. Ti—ti yawihu...Ti yoohivaanyiheya ya elapo. Elapo yothene eluttanne ni Epwaro yeeyo Yuulupale, ni khekhanle ohalaka etthu. Owo oottheka. Owo ohaana oliva mwaha wa yeeyo. Hata wira owo ahaalakenle sayi, itthunelo sawe saari exeeni, wala etthu ya yeeyo; owo onoorowa oliva mwaha wa yeeyo, khula enamuna.

Vakhala wira Epwaro ahu Yuulupale ya milattu ni exariya aya envekela nlevelo noophwanelela, khivatempe nyuwo ophwanyaneya Opwaro wo Olamuliwa wa Muluku, okathi onrwaanyu ni Ephome ya Yesu Kristu mmatatani mwanyu? “Kinrowa omwiiriha exeeni Yesu ula oniihaniwa Masu ootthekitheliwa?” Nyuwo muhiwa Eyo. Moosuwela wira Ekeekhaai. Yoolipiheriwa voomalela.

¹⁵⁶ Namwiiva? Nyuwo mwaamutthuna namwiiva Masu a muromolelo, omuhiya Kristu oohittheka? Nyuwo mwaamukhomela? Nyuwo—nyuwo mwaamuloiwa omukuxa Baraba? Mwaamuwerya onvekela Baraba? Aakhanle wiiraka sayi mutthu yeeyo, onvekela Baraba, namwiiva a Masu, ohiya othanla Masu, Aneene, akhanle Ekumi! Ni Awo ari mmatatani mwanyu.

¹⁵⁷ Okathi wiiwalyaaka wiiviwa wa Mukhulupale Kennedy, Mutthak’ola waaroomorela vamurimani vaka. Miyo khuupuwela, mulopwan’ole onrowa wira exeeni? Khorina hata enamuna yo ovuluwa vano. Khino owo oovenya okathi ula khusuwela etthu eninwehererya.

¹⁵⁸ Ni nyuwo munoorowa ovenya nihiku nlo. Va, wala mufiitani, khula nipuro muryaanyu, munoorowa ovenya nihiku nlo, natampi, munoosuwela wira yookhala Ephome mmatatani mwanyu, ni Ephome ya Mwaana a Muluku, ni nyuwo moottheka mwaha wo omwiiva Yoowo. Etampi anyu yoomwiiva Owo. Ohaamini wanyu Masu Awe, ovonya wanyu woona wiisuwanyeiha Wawe, yooriipiha murima Erooho Yoowaarya khukhuma. Exeeni mukhanle anyu wiiraka woohikhala weemela Woolamuani wa Muluku, musuwelaka etthu enrowa owiirani! Ayo, ephome ya John Kennedy mmatatani mwa Oswald enrowa

okhala etthu yaamukhaani, ovikana Ephome ya Yesu Kristu mmatatani mwanyu okathi onrowaanyu weemela ohoolo wa Muluku.

¹⁵⁹ “Kimwiirihe exeeni Yesu ula oniihaniwa Kristu?” Pilato aahihimya. Owo aaheliwe mmatatani mwawe.

Vano Ephome ya Yesu Kristu yooheliwa-tho mmatatani mwa muthukumana'ola. Yooheliwa mmatatani mw'elapo ela, ni molumwenkuni mu mothene, weiwo ifiita iya siphialyaya-wo, ni itthu siilipiheriwe ni soonihieriwe ni Muluku.

Vano ninrowa omwiiriha exeeni Yesu ula oniihaniwa, “Mmosaru nsana, olelo, ni mahiku othene”? Ninrowa omwiiriha exeeni Yesu ula? Moolikana wira mukhale voopuroni vanyu mpararini mw'Awe?

¹⁶⁰ Pilato, ni siiso iiralyawe Pilato, sinihala itthu tthaaru mukhanle anyu omwiirihaka Owo. Pilato aahehererya sootthaaru, nave khuvonya. Ilavilavero tthaaru mukhanle anyu weeheryaka wira sivare muteko, masi khasinkhalakhala sivaraka. Pilato aahehererya omukumiha mmatatani mwawe. Masi amala-ru oheliwa mmatatani mwanyu, ori mmatatani mwanyu. Pilato eeherenrye inamuna tthaaru soovirikana, khuvonya.

¹⁶¹ Nihaana woonanana ekeekhai yo wira Owo ori mmatatani mwahu. Ninnimoona Owo Mmasuni mwAwe. Hiyo ninnimoona Owo ailipiheryaka Mmansawe. Noosuwela wira Owo mmosaru nsana, olelo, ni mahiku othene. Eyo ekeekhai?

Vano, miyo nkinlavula paahi ni muthukumano ola va voosiis'ula, okhala wira kinlavula n'atthu imiya thanu na mosa, imiya thanu na piili, khino, masi kinlavula n'atthu imilyawu sene mufiitani mu enrowa mulaponi mothene. Munnona? Owo ori mmatatani mwanyu, mufiitani iwo, khula nipuro muryaanyu. Moosuwela wira Ekeekhaii. Mwaahisuweleke, weeso khamunoonana; nyuwo khamunwerya woona Masu, nnakhala khamunwerya omoona Muluku Mmasuni. Ni Owo ori mmatatani mwanyu. Vano munrowa omwiiriha exeeni Yoowo?

¹⁶² Pilato aaheererya wiiluluxa Yoowo, masi hiyo nihaana woonana mwaha ene. Pilato aahaana woonanana. Owo aahisuwela. Owo aahiwa.

Ahe, nyuwo muniira, “Nkinatoko woona etthu ya yeeyo.” Nyuwo muhiwa Eyo, khula enamuna. Nyuwo muniwa Yeeyo vano. Munnona?

Owo aatthuna wira, Yesu ampakele mwiiriirya, wala ethepyelo. Masi Owo khaapaka ithepyelo; Owo aapaka paahi ntoko Muluku saamuhimeryaawe wira Owo apake.

¹⁶³ Nyuwo muhiwa, “Waamini onrwa mwaha wo wiiwa.” Mookhalana waamini, nto munookhuma...wira mukumihe yeela mmatatani mwanyu. Masi mwa khula enamuna, owo

aahaana woonana mwaha ene. Owo aahiira, ni hiyo nave nihaana woonanana myaha sene. Owo oosuwanyehiwa voomalela. Muupuwele, ni Ephome ya Mutthu mmatatani mwanyu!

¹⁶⁴ Mutthu ohaana okasooa akhalana-ru ephome ya mutthu mukina mmatatani mw'awe. Nkawehani ntteeke. Namweetiha ntteeke, okathi oneetihaawe ntteeke nlo, owo onooweha khula ekaruma. Mwaha wa xeeni? Owo orina ephome ya mutthu mmatatani mwawe. Khula ekaruma yaamukhaani erina owehiwa, owo onooweha. Akhuma-ru ni orukunxa ntteeke, owo—owo—owo onimuupihia mu—mu—mutoro, maakina, ni okupali wira onnivara muteo saana. Ni osukhuma ekaruma yo waakuvihia vathi, wira oone sintoko okela wa ettheke onni—onni . . . sintoko onoowerya o—o—okakha, wala osukhuma eelise, nave, ni ettheke yoophiyerya wira ekumihe vathi.

Anci-ene a nyuwo, mootoko okhala, mmutteeneni, wala okilaathi vale, nto ntteeke nothene ninoottikinyeya, voolipa-vo. Owo onoovaha sothene nrinaaya, wira oone sintoko yookhala etthu ehikhanle voopuroni vaya. Vakhala siiso, enimooneya ni ninoottipha. Masi owo onooweha-tho, vakhala wira owo ohaana okhala vaavale okathi vakhani, mpakha awehe-tho. Ni apisihiwa-ru vakhani, owo onooweha-tho.

¹⁶⁵ Moota Ekereja yaatthuneyaya okhala ewehaka-tho, emaara ekina, emaara ekina, emaara ekina! Hiyo ninlipelela Orwa Wawe. Ninoovenya, ninlipelela ottukhuwa. Vanreerela niwehe ni Masu, kahi ele mutthu ohimye awe. Mukupali wira munnisuwela, mmansinyu, ntoko musuwelelo w'omeekha ni Kristu. Nwehe-tho, emaara ekina, ni emaara ekina.

Mwaha wa xeeni? Owo orina ephome ya mutthu mmatatani mwawe. Vanreerela owo awehe.

¹⁶⁶ Ankhi meetiku, ohinatthi operasawu? Nihaana mameetiku amosa-amosa akilaathanse va voosiis'ula. Nwehe, meetiku, etthu oniiraawe ohinatthi orowa wooperari. Owo ommutthuna raayu x. Owo onootthuna omwaleya ephome. Onootthuna omwaleya murima. Onootthun osuwela mwaarina-ene kamasi, ohinatthi woovahani anestesiya. Owo onooweha khula ekaruma; onookaphuliha, oraatta-ene, wira oone wira sihikhalane axiitthu. Owo onimwiira sothene. Owo ooweha, khuweha, khuweha, khuweha, emaara ekina. Mwaha wa xeeni? Owo orina ephome ya mutthu mmatatani mwawe. Owo onthuna alipe oratta-ene wira sothene siri saana ntoko sinweryaneyaya okhala.

¹⁶⁷ Ankhi nyuwo? Ankhi nyuwo, natampi, munoona exeeni wa yeeyo?

Okhalana ephome ya mutthu mmatatani mwanyu, othokorerya ntoko namweetiha ntteeke, ni owo onniweha; meetiku, ni owo onniweha; ni sothene sikina, nasiyensiya

othene; mwakhalana ephome ya mutthu mmatatani mwanyu, yeeyo enrowaanyu wira!

Mphuki aarowaka ohimya nlamulo, nwehe moota owo onsomaawe iliivuru iyo, emaara ni emaara ni emaara ni emaara ni emaara ekina, wa khula etthu ekhaani onweryaawe woona, owo ohinatthi ohimya nlamulo. Okhala wira, owo orina ephome ya mutthu mmatatani mwawe, ehaana okhala etthu va wira elipiherye yeeyo. Munnona?

¹⁶⁸ Ankhi hiyo, naamoonaka Owo osuwanyeihiwa voomalela, wira, “Owo mmosaru nsana, olelo, ni mahiku othene”? Owo ori vaava. Owo ori mmatatani mwahu. Owo ori mmatatani mwahu. Owo ori mmatatani mwanyu! Munrowa omwiiriha exeeni Yoowo? “Kinrowa omwiiriha exeeni Yesu ula okhanle Kristu ootikittheliwa?”

“Eyo eniira exeeni? Munsuwela sayi wira ti Yoowo?”

Natiri a nihiku nla, nihiku ninkhalaahu, khereere Yolempwa p’uhimya wene, ipolekaata sinci-ene sa Yeeyo sirina omaliheriwa, ipolekaata iya sookiserya sa nihiku nla nookiserya. Sookhala itthu kamosa-kamosa sipwehiwe *va* sirina okhumelele, ni iya iri va. Exeeni iyo? Kristu yoowo ootikittheliwa, Masu ooreerihiwa! Munrowa wiiriha exeeni Yeeyo? Munrowa otumiherya muromolelo Yeeyo?

¹⁶⁹ Vano Pilato iirale exeeni? Pilato aaphavenle omukumiha Owo omunyawa mmatatani mwawe, airaka. . . Etthu yoopacerya Pilato iiralyawe waari ophavela omunyawa Owo omukumiha mmatatani mwawe, airaka, “Oh, Owo ori saana. Owo ori saana.” Munnona?

¹⁷⁰ Nyuwo muniira, “Oh, Pilato oowooniha othunku.” Pilato, anci-ene aya ammukhaliha naxariya? Nnari, nnari, nnari! Owo aari mmatatani mwawe. Owo aahiiwa Mutthaka, aahoona Masu, ni Owo aari mmatatani mwawe. Ni siiso Owo ori mmatatani mwanyu. Ti yeeyo.

Owo iirale exeeni? Owo aaphavenle ohimya wira, “Oh, ahe, Owo Mutthu ooreera murima. Nkiphwannye hata nthowa mwa Yoowo.”

¹⁷¹ Eyo yaahikhale yo—yo—yo waakhula ya anci-ene olelo! “Oh, khiyaavo etthu evonyeiye ni Masu. Kinoona wira ari saana. Bibilia ohaana exariya, masi hiyo ninaamini ekereja. Muromolelo ahu khoniiraana ni Yeeyo.” Munnona? Munnona? Vo nookhala nikhuru n’atthu nimphavela omunyawa Owo mmatatani mwaya.

“Miyo nkiphwanya hata nthowa mwa Masu. Yaari saana wa arummwa mahiku aya, masi hiyo ninkhala nihiku nikina. Hiyo khaninkhala nihiku n’arummwa, tivo miyo nkirina wiiraka ntoko arummwa siiralyaya. Nkirina opatisiwaka enamuna awo yaapatisiwe aya; miyo kinkhala nihiku nikina. Miyo nkirina

okhalanaka itthu awo yaarinaaya; miyo kinkhala nihiku nikina. Erooho Yoowaarya yaavahiwe nikhuru nenle paahi.”

¹⁷² aHeperi 13:8 ammuhelele-tho Owo mmatatani mwanyu. Khanivo ntthyawelo! Owo t’olipiheriwa voomalela, “Owo mmosaru nsana, olelo, ni mahiku othene.” Khamurina ntthyawelo. Khimukhanle onvahereryaka Owo okathi mukina. aHeperi 13:8 annilamula miyuupuwelo sanyu, ni omuhokoloxerya-tho mmatatani mwanyu. Tivo Yesu ori mmatatani mwanyu, siiso ntoko aaryawe mwa Pilato.

Nkawehani. Nyuwo muniira, “Masi nkisuwenle.” Ahe, nyuwo muniwela-ni?

¹⁷³ Pilato aari pakawu. Amwaar’awe yaari apakawu. Masi Muluku, wira akhalihe exariya, aahimuroiha muthiyan’owo vale khwira, “Muhikhale nnaata ni Mulopwan’ola naxariya.” Owo khwira, “Miyo koohaawa nihiku nla.” Vekeekhai, waari voosiisu, eyo yaari ohiyu, ni iwoora miloko miili ni xexe sinaalakiwa okhala nihiku nimosa. “Miyo kaahikhhalana sooloha kamosa-kamosa ohiy’ula, sa Mutthu owo naxariya. Muhikhale naata ni Yeeyo.”

¹⁷⁴ Vano owo khwira, “Ahe, nto, vaari siiso, miyo koomunyawa Owo mmatatani mwaka.” Masi owo khaawenrye wira.

Nnakhala nyuwo khamunwerya. Vammalanyu wiiwa Ekeekhai, muhaana okupali wala okhootta. Khiyaavo enamuna...Ayo, mulopwana, muhaana wira. Olopolo wa Apwiya!

¹⁷⁵ aYuta yaahikhuwela, “Ephome Awe enimorele hiyo; okhala wira hiyo niniwaamini anamukuttho ahu, eyeettiheryo ahu ya muromolelo, nihinatthi omwaamini Owo.”

Eyo eri vo. Munnoona makhuru olelo? Masi othene ahaana okumana ni mwaha wa Muluku. Nyuwo othene muhaana wira, khula enamuna, pakawu wala etthu p’itthu mukhanlyanyu. Oohaamini, Mmetotista, muPatista, Prespiteriyano, ookuttihiwa, ooriirya, ooviha, etthu p’itthu mukhanle anyu, muhaana woonanana ni mwaha enamuna emosaru. Hata mutthunaka, wala nnari, Eri mmatatani mwanyu. Ti yeeyo.

¹⁷⁶ Nto aakhala ale aneererya eyiirelo ekina ya Pilato wira ehapuwe mwaha ene, omuroiha Owo wa Kesari mukina. Munnona?

Pilato iirale, “Vano nwehererye minuutu mmosa. Miyo—miyo—miyo nkinthuna okhala nnaata n’Iyo. Miyo—miyo—miyo—miyo...Owo Mutthu naxariya. Miyo—miyo nkinthuna okhala nnaata ni Owo. Oh, miyo—miyo kinnaamini kiiwale aka. Miyo nkinatoko omoona Owo opaka mwiiriirya, masi aakhala anamoona anci-ene a Yoowo. Miyo—miyo—miyo kinnaamini wira Owo Mutthu naxariya. Owo Mutthu ooreera murima,

moone, masi—masi miyo—miyo nkinthuna nnata ni Yeeyo, yoomi. Miyo—miyo—miyo paahi... Miyo kinoomunyawa Owo. Mukiruuhele maasi vakhani. Nyuwo othene munnikikhalela onamoona va.” Ayo. Masi Muluku aakhalela onamoona, nave. Owo aari mmatatani mw’awe.

¹⁷⁷ Nave-tho Owo ori mmatatani mwanyu. Moone, nyuwo moosuwela enihimyaaka. Munnona? Kahi nyuwo paahi, masi efiita ela. Owo ori mmatatani mwanyu. Munrowa omwiiriha exeeni Yoowo, Yesu ula oniihaniwa Kristu? Kristu ti Masu Oottikitheliwa. Munnona? Munrowa wiiriha exeeni Yaawo? Owo Mutthaka w’okathi. Nihiku nri va, noowooniheriwa voomalela ni Bibilia nave ni Muluku. Munrowa wiiriha exeeni Yaawo? Munrowa otthyawa sayi mwaha owo vano? Munrowa osyaka sayi yeeyo? Owo ori mmatatani mwanyu! Nto mwaha wa Oswald onrowa okhala mwaamukhaani, ni wawinyu, hata murumeyi wala munakhale-ru pani.

¹⁷⁸ aYuta ale yaari anamukuttho, ni marabbi, awiixuttihi, atthu oowaarya; masi Owo aari mmatatani vamosaru. Owo aari Masu, mwaha wa Muluku wa nihiku nle, nto awo yaahivonya woona Yoowo. Ale oothanliwa paahi ti yoonale Eyo, ale yaaminni.

¹⁷⁹ Vano othene nihaana woonanana mwaha owo. Mwa khula okathi enkhalaka siiso, khula okathi. Moovirani w’okathi wa Hawa ni Atamu, erwaaka mpakha okathi wa Nowe, erwaaka mpakha okathi wa Daniyeli ni Peltesasari ni Napukutonosoori, erwaaka mpakha okathi wa Kristu, erwaaka mpakha ewoora ene yeela enkhalahu, enkhalaka emosaru, mwaha wa Masu wookhumelela. Kahi eyaaminelo aya, wala kahi muromolelo, kahi nikano, masi, mwaha wa Masu onnikhalaka woovirikanya itthu iyo. Siiso, olelo, Ari mmatatani vano.

¹⁸⁰ Nto ale eneerya eyirelo ekina ya Pilato, wira yiihuluxe Owo, emuroihaka wa mutthu mukina. Pilato iirale, “Vano, moosuwela? Miyo kinoomukumiha Owo mmatatani mwaka. Kinoomunyawa Owo mmatatani mwaka ni maasi ala. Tivo miyo paahi... Kihaana omwiiriha etthu Owo. Vano kinrowa wira exeeni? Kinrowa onveleeliha nipuro nuulupale, ni pixipu.” Uh-huh. Ayo.

Ti yeeyo awo aneereryaya wira olelo. Munnona? Awo yaanveleelinhe Owo wa Kesari. Eyo khiyaamukuminhe Owo mmatatani mwa Pilato, khiyaamukuminhe mmatatani mwa hata mutthu. Yiirihale exeeni? Mwaha waamutthikenle yoowo. Ommutthikela mutthu yoowo.

¹⁸¹ Nyuwo muniira, “Ahe, miyo kaamwiira, miyo kaamwiira, miyo kaamukupali muromolelo aka waakupani-ru.”

Muromolelo anyu ori Mmwaataanoni wa Ikereja, woolamuliwa! Awo anrowa waakhela sayi? Epholovolo enoonthika, enoonthikelani yeenyu. Kahi ele muromolelo anyu onihimyaaya; ti, nyuwo munihiyani? Awo aamukhootta Owo;

vano munrowa wiiriha exeeni Yeeyo? Eyo t'itthu enttharelana. Munnona? Eyo khemmukumihwa Owo mmatatani mwanyu.

Owo t'olipiheriwa voomalela. Owo t'osuwanyeihiwa voomalela, Masu a ewoora ela, natiri a ewoora ela. Kahi natiri a ewoora ya Lutero; eyo yaari iwe nto, awo yaari Masu okathi wa anamareherya. Ntoko, nyuwo othene mwiiwale *Ikanyeryo Thanu Na Piili*, moovirani w'okathi wa anamareherya, Nxeni na wiitho ntoko mutthu (mutthenkeso) waahikelihwa; masi ela ethoni ya xawawe, Nxeni nikhumme wira nitharimule olelo.

¹⁸² Nto t'ani aarowa weererya ohimya wira awo khayaari Masu a Muluku oowuupuxeriwa, okathi Owo ohimye awe khalayi ene va, ni khukiruma w'Arizona wu khuttikiha, hata ni siyensiya ni sothene sikina, ni khooniherya Eyo okhala siiso! Eliivuru *ila* yookhunliwa, ti yeeyo, elipelelaka paahi wira Ekanyeryo ya Neethanu neili esuwanyeihiwe ya Orwa wa Kristu.

¹⁸³ Vaareera, Owo ori mmatatani mwanyu. Muhaana wira etthu ni Yoowo. Muhimukumihe. Ayo, mulopwana. Mwa muxovo ola, kaatthuna kihimye, “omuroiha Owo wa mutthu mukina.”

“Muromolelo aka waakupanli-ru Yeeyo, Munna Branham, miyo—miyo kaamukupali. Masi, moone, ame aka yiiraka mpannta w'ekereja yeela.” Awo akhanle okathi aya; owo kahi nyuwo. Ti nyuwo vano. Nkawehani vatthu awo yaarinaaya okhuma, wira ekhale ele yaaryaya. Ankhi nyuwo? Vaareera.

¹⁸⁴ Nkawehani. Nyuwo muniira, “Ame aka yaari muPentekosite. Awo ahiira *elexe n'ilexe*. Awo yaakhumme mmutterhenkesoni.” Masi kimphavela olavula ni nyuwo vano. Ankhi nyuwo? Munnona?

Mwa muxovo ola, ninnaaphwanya anci-ene oosoma. Vano, koosuwela wira kinoorowa osikulihwa va, masi nkiniira voolakela. Vakhala siiso, weeso miyo—miyo kaahaana okhala waltaari, kirukunxaka murima. Kinihimya ela ni ophenta wa omuluku.

¹⁸⁵ Yesu, okathi Owo eemenle awe vale, ni aFarisi ale, aahaana waaleela, “Nyuwo mwa a atith'inyu, xetwani; miteko sawe munnitthuna ovara.” Nnakhala vo vamwiikimanyo, ahaavekelela murettele ni omoreliwa ikharari, ale yaamukhomenle Yoowo. Moone, Owo khaananariwe ni yaawo. Owo iirale, “Nyuwo nloko na ivili.” Munnona? Munnona? Sothene, Owo aahaatakhalihwa ni itthu sothene saawenrye awe, moone, nuumala khwaavekelela vamwiikimanyo. Munnona? Khiyaari wira Owo aatthuna wira yeeyo; khiyaari yeeyo, masi awo yaahaana woona evonyeryo awo yiiraaya.

¹⁸⁶ Ni miyo kinihimya yeeyo olelo, mwa muxovo ola wo “onvahererya ottheke mutthu mukina,” wala etthu hiyo eniihanahu mmutterthini wa anakhotto, “onvahererya ottheke mutthu mukina.” Hiyo nineererya ovahererya, ntoko Atamu ni Hawa yiiranse-aya.

Hawa aaheererya. Atamu iirale, “Muthiyana Nyuwo mukivahale anyu,” nto nlo khinaari ntthyawelo wa yoowo. Munnona? Muthiyana iirale, “Enowa p’ikootonthe. Owo...Ti yeeyo yiirale ekhapa ni miyo. Eyo erookoototha. Eyo ti yiirale *yeela*.” Eyo khiyaasusinhe, hata vakhani. Awo yaahirowasa woolamuliwani, vamosaru. Ayo, mulopwana. Vaareera.

¹⁸⁷ Khiyawenrye ovahererya, emosa...Khakhanle wiiraka, “Muromolelo aka waaminni-ru Yeela, miyo—miyo nave. Masi, miyo kinnikhalaka mmuromoleloni mu.” Eyo kherina nnaata n’iyo. aYuta yaahikhalana etthu emosaru, ni nyuwo nave.

¹⁸⁸ Ni, nwehe, anci-ene ninaaphwanyahu mwa muxovo ola, atthu a elekeyelo yoophwanelihiwa. Vano nwiriyane oratteene.

Moone, ilimalelo, ele eniihan’ahu elakeyelo olelo, ti yeeyo Satana aamukumihenrye awe Hawa, osuwela vakhani. Iirale, “Maitho anyu kahi oothukuwa, nyuwo khamunsuwela saana Yothene Eyo.” Owo aanisuwela Masu, ni yaari yeeyo tu. Owo aahimoono Muluku alipiheryaka Masu awo, nto eyo yaahaana wira ekhanle yoophiyerya. Owo aammusuka mwEkumini Ehinimala, okathi owo aakhalaawe ni Masu awo. Okathi owo ohononne awe Masu awo, owo aahikhalana natiri a Muluku wira aamukhwa nihiku aarowawe ohonona. Nto, vahononne awe Yaawo, owo aahikhwa. Ti yeeyo.

¹⁸⁹ Hiyo nookhalana Masu oolipiheriwa a Muluku va, alipiheryaka, yooniheryaka ni Erooho, wira Owo oonaakhela ni oonivaha Opatiiso wa Erooho Yoowaarya. Hiyo nimpatisiwa muhina mwa Nsina na Yesu Kristu. Ehapari yooreera emosaru, ithoonyeryo imosaru, mitikiniho mimosaru, muteko mmosaru, hata Nripu na Mooro nimosaru noowooneya ohoolo wahu, nooniheryaka ithoonyeryo ni mitikiniho. Khanivo ntthyawelo, hata nipuro.

Ni eyo vekeekhai t’ile Bibilia ohimmye awe wira yaamwiiraneya mahiku ookiserya, ni wiitthana wa Malakhiya 4, “wira ahokoloxerye Waamini w’ana otthikela-tho w’axitiithi aya.” Nto naanaanoru nuumala yeeyo, atakhali animweetta... ahiiso anaxariya animweetta vasulu va ittuurwa s’ale ootakhala; olumwenku wothene waahaana opahiwa. Ni ikapwitthi sa aatomu siri iwe, silipelelaka soopwehiwa.

¹⁹⁰ Muhoona etthu Alemaanya iiralyawe vasuwelanse aya wira Mu-... Mukhulupale ohiiviwa? Aroothukumanya muttiithi aya wa anakhotto naanaanoru, okhala wira eyo yaari etthu emosa paahi yaamukhottiherya Ruusiya woopela iwe. Ni amanne... Kennedy aammala-ru waaveleeliha moolumo ale, wira, ewooro awo yaarowaya wira yeeyo, wira owo aamwafuca mulaponi, ni yaamurimeela wAlemaanya. Munnona? Ni yuupuwela wira yaamuwerya okuxa, masi kuhiyo p’ukathi nlelo, moone. Munnona?

¹⁹¹ Ninnaaphwanya alaleyi oocencera, oosoma, anamalaleya, ephavelaka ovahererya Eyo wa mutthu mukina. Munnona?

Vano, Pilato ahaahimenrye-ni wira, “Ahe, nwehererye minuutu mmosa, Mulopwan’ola...amwaar’aka ahoorwa khukileela, ni kihiiwa onamoona wunci-ene wa Nyuwo. Moosuwela, miyo—miyo koocaliwa. Kaatthuna kisuwele. Kiireke exeeni wira kikhalane Ekumi Ehinimala, Mulopwana? Nyuwo muri mmatatani mwaka. Kiireke exeeni?” Ahe, owo aamwiira—owo aamwiira...Owo iirale, “Nyuwo mwa—Nyuwo mwa Mesiya? Mwa—Nyuwo mwa—Mwene a aYuta?”

¹⁹² Owo khwira, “Nyuwo moohimya. Nyuwo moohimya.”

“Wala, munleele, vekeekhai, Nyuwo mwa Mwene a aYuta?”

Owo khwira, “Miyo kiyareliwe yeeyo.”

Owo khwira, “Nkinwerya ophwanya hata nthowa mwa Yoowo.” Uh-huh. “Ahe, miyo kinoomunyawa Owo.”

¹⁹³ Owo aahimwaakhula, masi khaawenrye waakhela Eyo. Mwaha wa xeeni? Waamumpweteya ntittimiho awe. Vano owo khuupuwela onvahererya humu a estaatu, moone etthu iiralyaawe mwaha wa Yeeyo. Munnona?

¹⁹⁴ Etthu emosaru vano, mwaha onnikhumelela-tho. Munrowa wiiraha-ni Yeeyo, Masu? Murina wira exeeni, omukoha humu, wala pixipu, wala mutthu, vakhala wira pooti orukunxa enamuna anyu ya opatiiso, vakhala wira pooti wira *ela*, wala wira *ela*? *Siiso* mooneke, ni, “Tthiri, khamuniira.” Enootthikelani yeenyu. Mwaira vale, munimoomoliwa. Munnona?

¹⁹⁵ Enoopwetexa ottittimihiwa w’atthu. Ayo, awo—awo annuupuwela...Ni mwaataano wa muromolelo khiwaarowa ovilela...Ntoko—ntoko Pilato anvahereryaka mwaha Kesari; awo khiyaawenrye ovilela Eyo. Kesari aattikihenrye mmatatani mwa Pilato. Tivo awo yeerenrye onviriha Owo mwawaya—mwa akhulupale aya a miromolelo, nave eyo khenvara etthu. Etheppyelo ela khenavareke muteko, ni khenrowa ovara etthu. Khiyaavanre etthu wa Pilato; khenrowa woovarelani etthu; khenrowa onvarela muteko hata mutthu mukina. Vano, yaneili, etthu mukhanlyanyu wiiraka ti... .

¹⁹⁶ Yaneeraru, kiireke, onkhala omukupali Owo wala omukhootta Yoowo. Khivanweryaneya omunyawa Owo. Khivanweryaneya onvahererya Owo eyeettiheryo ekina, wala etthu ekina. Muhaana wonnanana mwaha ene. Tiivo exeeni mukhanle anyu wiiraka?

Ntoko Pilato, eemenle ni etthu emosaru, khwira, “Mukivahe maasi vakhani, kinoonyawa, wira kooniherye!” Vatthinke awe, nlelo aahaana ohimya nlamulo; khiyaamukuminhe mulattu. Owo aahiphavela wira, “Ahe, miyo, kaahiweryeke omukumiha

mmatatani mwaka, kinoomuhela mmatatani mwa Kesari.” Nave yaamutthikenle, yoowo ovenya wene.

¹⁹⁷ Eyo enoowiirani nyuwo, nave, ntoko mutthu mmosa. Munrowa wira exeeni? Kahi ele amaama yiiralyaya, ele apaapa yiiralyaya, ele pastore oniiraawe, ele Munna Branham oniiraawe, mutthu ti mutthu; Eri mmatatani *mwanyu!* Munrowa wira exeeni mwaha wa Yeeyo, ni Yesu ula oniihaniwa Kristu? Okhala wira, mookhalana Ephome mmatatani mwanyu, ni Eyo Ephome ya Muluku. Vano munrowa wira exeeni? Okhala oottheke mwaha wo okhomeliwa. Munnona?

¹⁹⁸ Nyuwo pooti omukhomela Owo, okupali eyaaminelo anyu wala etthu p'itthu mutthunanyu, wala wira, “Ahe, miyo kinoonvahererya mukina. Nkinrowa okhalana nnaata ni itthu iya sa ekereja.” Khamukhanle wiiraka yeeyo. Owo ori mmatatani mwanyu. Ti yeeyo. Khimukhanle wiiraka. “Kinooliyala etthu yothene.” Khimukhanle wiiraka. Nlelo eri mmatatani mwanyu. “Ahe, miyo kinoochimya paahi, ‘Pastore aka okiixuttihale *ela*.’” Epholovolo eyo enimoopa, ekhumelaka ottuli. Eyo ti yawinyu. Moosuwela. Vano, nyuwo munoowerya omwaakhela Owo wala munoowerya omukhootta Owo, mwa khula enamuna entthunaanyu wira. Exeeni? Ehaana omalela emosa wa seiyo.

¹⁹⁹ Vano exeeni? Ntoko Yesu saahimenryawe aFarisi ala, Owo iirale, “Okhala wira nyuwo mwa aFarisi oohoona,” moone, T'ani aarowa ohimya etthu emosaru olelo, “nyuwo awiixuttihi anatiini oohoona, munniwerya otaphulela okathi wa komunismu. Nyuwo munwana ni yeeyo saana, ni moosuwela wira Muluku ovenxale etthu ene yeeyo wira yoopwetexeni.” Moone, muhisuwelaka Soolempwa. Munnona? “Nyuwo, munniwerya otaphulela wira komunismu onoorowa okuxa olumwenku. Munniwerya woona yeeyo. Munniwerya otaphulela yeeyo.”

²⁰⁰ Myaha sahu sothene sinimwaasa komunismu. “Mmukumiherye ota komunismu!” Kinniiwa mpakha kimpheeleyaaka wiiwa. Miyo kinninvirikanya, nave. Veekkhai, miyo kinninvirikanya. Masi miyo kirina nthowa ni mulopwana wala muthiyana onimukhootta Yesu Kristu, Masu. Wala, munakhale-ru mulaleyi wala etthu p'itthu mukhanlyanyu, nyuwo mwa ekhottiheryo wa Kristu onvikana komunismu uwo. Owo t'ohisuwela ni khonsuwela hat'etthu ya Yeeyo. Muhaana osuwela. Munnona? Munniwerya otaphulela okathi wa komunismu, masi khamunwerya otaphulela ethooneryo ya nihiku ninkhalaanyu.

²⁰¹ Yesu aahaahimeerya aFarisi ale, khwira, “Nyuwo anawoothel!” Khwira, “Nyuwo munookhumela ota ni oweha osulu, ni wira nsuwa ti nooxeerya ni na mahittette, meelo onookhala mwanankhaya. Wirimu wakhala wowooneela,” khwira, “nyuwo muniira meelo ninrowa okhala nihiku noowooneela.” Khwira, “Munniwerya otaphulela ithooneryo

sa okathi, wala ithoonyeryo sa wirimu ni mukhalelo wa okathi, masi ithoonyeryo sa okathi khamunsuwela.” Owo aari vale, Mesiya, ni akhoottiwaka.

Ni hiyo okathi wothene ninlavula sa komunismu ni ithu iya, masi, ethoonyeryo y’okathi, khaninvara. Munnona? Ninvira vasulu va yeeyo, ninoovitha eyo. Yiiraanaka vamosa naanaano a mwa ohaamini, ni awo animwaakhela, masi annivonya osuwela ni woona ethoonyeryo y’okathi Bibilia ohimnye awe wira yaamukhala.

Moovara? Kihaana omaliha, kaakuvaka saana vano. Vanootepa oxa, moone.

²⁰² Ntoko siiralyaya axitiithi aya, awo aniira siiso, etthu emosaru olelo. Vano, ethanlelo ehiiriwa. Ehaana wiiriwa. Muhaana ophierya, mwa enamuna khata. Munnona? Okhomeliwa-tho wa Masu, wala munrowa wira exeeni? Okhomeliwa wa Masu ori mmatatani. Okhomeliwa ni weemexiwa Masu oolipiheriwa, mwaha wa—mwaha wa muromolelo, ntoko Pilato siiralyawe, aphavelaka onvahererya mutthu. Vano munrowa wira exeeni, ntoko mutthu mmosa, ni Masu ooreerihwa aniihaniwa Kristu?

Mmosaru nsana, Kristu mmosaru yoowo aareerihale Masu mahiku a Nowe. Kristu mmosaru, yoole—Mwiri yoole waari omatta w’Edeni; Hawa aahiyale awe, olya Mwiri yoola w’Ekumi, wira akuxe mwiri wa osuwela; owo, aahiyale Mwiri w’Ekumi, wira okuxe mwiri wa mookhwaani. Okathi wa Nowe wiirale etthu emosaru. Mahiku a maprofeta, awo yiirale etthu emosaru. Mahiku a Kristu, awo yiirale etthu emosaru.

Ni awo ari va olelo. Khula mmosa alavulaka mwaha w’okathi awe, ni, okathi etthu iyo emaliheriwaaya, khula okathi awo yaakunxe miyuupuwelo saya sa muromolelo, ni siiso, ni osuwela wa molumwenkuni ohiya Masu ooreerihwa a Kristu. Munrowa wira exeeni, ntoko mutthu?

²⁰³ Pilato khonaweryeke omukumiha Owo mmatatani mwawe. Ki—kinoomaliha, tivo mukhale oomaala okathi vakhani paahi. Pilato khonaweryeke omukumiha Owo mmatatani mwawe. Nnakhala nyuwo, enamuna owo iiralyawe, eeheryaka khula emosa wa iyiirelo iya. Owo khonatoko owerya. Moosuwela etthu yaamukhumelenle Pilato? Owo waampweteiye muupuwelo awe. Aahiphierya nipuro sothene aaweryawe wiiwa waari okhomeliwa iwo. Sothene aaweryawe wiiwa waari oviruha mpakha vookiserya aakhanlyawe oovahuwa.

²⁰⁴ Vano awo aakhalana ethale oNoruweeka wu, wala nnari. . . Kileveleliwe. Osuwiisa wu; weiwo, kitonko aka okhala-wo, ntoko misiyoonaariyu. Enihimmwa wira atthu konto sene annithukumana weiwe, okhuma molumwenkuni mothene, Namathanu Yoowaarya; ntthiya na maasi vaavo Pilato iisivalyaawe-vo. Vookiserya owo aarimwiirihela khukhwa

mutankini mu mwa maasi. Ni enihimmwa wira khula Namathanu Yoowaarya, ewoora yaneeraru ya makaaripi, maasi ankhala ooripelela, anookaphula okhuma vaavo erutthu ya Pilato emphwanyanyaaya. Owo aarookhoota. Nlelo yookhala Ephome mmatatani mwawe. Ni owo aarookhoota, owo aahikhoota; maasi.

Khimukhanle omunyawaka Owo. Khaavo maasi, nnakhala esapawu yoolokaxa, enwerya okukuttha. Owo ori mmatatani mwanyu. Munrowa omwiiriha exeeni Yoowo?

205 Va eri etthu emosa paahi mukhanlyanyu wiiraka. Mwaahiwerayeke omunyawa Owo; khamukhanle onvahereryaka wa etthu ekina; khimukhanle oviraka vasulu vootthokelela paahi. Khiyaavo hata enamuna. Etthu emosa paahi mukhanlyanyu wiiraka okupali Yeeyo, mmurimani mwanyu. Eyo ti enamuna yo wiikumihwa Owo. Mmukumihe mmatatani mwanyu mmuhele mmurimani mwanyu, wala mmuhiye Owo mmatatani mwanyu nto mukhale Woolamuliwani. Eyo t'itthu emosa paahi mukhanlyanyu wiiraka.

Emalelo ya Pilato yaari yoowoopiha.

206 Masu anihimya wira ale ammuhiya Owo mmatatani mwaya...Kaarowa osoma Yeeyo. Masi chimmye wira, "Awo yaahikhuwelela maluku ni miyaako. Awo yaahivekela, masi mavekelo aya khiyaareere opisa." Munnona? Awo yaahikhuwela, "Muniipithiherye owiitho wawe Ole okilaanthe Veehicieni, ni oviruma wa Mwaapwittipwitthi, eyo eri wira...Epwittipwitthi, Ekumi ya Mwaapwittipwitthi orwiiye. Okhala wira, Nihiku nuulupale na Olamuliwa nihoorwa, nto t'ani onrowa owerya ohala?"

207 Munuupuwela wira Oswald onrowa wira exeeni vano okathi owo onrowaawe okhala ohoolo wa Epwaro Yuulupale, ni woona maitho ale oonanariwa a—alipa-oophuka othene akilaanthe-ene vale? Owo oosuwela etthu enrowa okhumelela. Enrowa okhala esaala ya ekaaxi, wala oheiwa vale, wala etthu siiso. Owo ohaana woonanana eyo.

208 Masi ankhi nyuwo mwaphiya iwe ni Ephome mmatatani mwanyu, mwaha wo okhoota? Ni osuwela wira omooroni onimoolipelelani, opwetexiwa Ohinimala; mukhuwelelaka miyala ni miyaako; masi khuvekela, okhala wira mavekelo aphiyale voolekela.

Mwa aHeperi 10, "Nairaka etampi vootthuna." *Etampi* "ohaaminii." "Naahaamini-ru vootthuna nimanle-ene waakhela Ekeekhai, osuwela wa Ekeekhai." Khivanthuneya nyuwo waakhela Eyo; osuwela paahi Yeeyo. Khamurina okhalanaka Eyo, nyuwo paahi...Oh, nnari, nnari. Munnona? Khehimmye wira, "vammalaahu waakhela Ekeekhai."

*...nairaka etampi vootthuna nimanle-ene...
waakhela osuwela wira eyo ekeekhai, khuwo-tho
mukuttho mukina wa itampi,*

*Masi o...olipelela wowoopiha...mooro onvarela,...
onrowa ompwetexa nwanani,*

*...Okhala wira Muluku iirale, Wunla ikuhu ti
Wawaka, ni Miyo kinootthuvela, anihimya—anihimya
t'Apwiya.*

²⁰⁹ Hiyo naahaamini-ru Yaawo, vootthuna, nimanle-ene wooniheriwa Ekeekhai, khunrowa-tho okhala omoreliwa ikharari. Khunrowa-tho ovahiwa omoreliwa ikharari.

Pastore, muniwa efiita ela, ankhi yeeyo? Mempuru a mukereja, muniwa efiita ela, ankhi yeeyo? Munrowa wira exeeni, naahaamini-ru Yaawo vootthuna? Khimukhanle onyawaka Awo. Khimukhanle ovahereryaka nipuro nuulupale. Epholovolo enookhuma ottuli, wootthikelani yeenyu. Nyuwo muhiwa. Ankhi nyuwo? Munrowa weemela sayi Nihiku nle?

Owo ori mmatatani mwanyu wala mmurimani mwanyu, emosa wala ekina. Muluku anikhaliherye.

²¹⁰ Mwa—mwaaweryaka otthokelela paahi wiiva, ni ele envira vamurimani va mulopwan'owo! Owo iirale exeeni? Owo ovennye vaxiye-ene, omanle-ene wira.

Nkawehani, owo aahikhalana okathi. Owo aayariwe mutthu a wAmerika ootaphuwa. Owo aari mutthu a wAmerika. Masi owo khutthuna otumiha ihakhi sawe s'eyuulupale, wira akhale muRuusiya, nto eyo khumutthikela. Owo omuthenle mwali muRuusiya. Vano owo namuupuwela ootaphuwa a epartiitu komunista ya oCuba.

A muupuwelo wootaphuwa, “Miyo kinuupuwela mmansaka.” Kahi yawinyu wuupuwela. Munrowa omwiiriha exeeni Yesu oniihaniwa Kristu? Khamuhiyo mulipa-oowuupuwela ootaphuwa. Khiyaavo etthu ene eyo ya muupuwelo wootaphuwa. Muhiye muupuwelo waari mwa Kristu okhale mwa nyuwo.

Nivekele.

²¹¹ Mutthokelele miyuupuwelo iya, “Waakhanle-ene nttotopelo, vari ikuru, muupuwele yeela.” Eriyari ahu voosiis'ula, ni mufiitani mu, nave, kinoolavula. Nyuwo mwaaryeene vaava voosiis'ula, ni munasuwela wira khimukhanle saana ni Muluku, ni khamuyariwe ni Erooho Awe, ni Muluku ohaana...

Nyuwo muniira, “Ahe, miyo koolapa.” Kahi yeeyo enihimyaaka. Muluku ookupali? Nyuwo pooti wira, “Ayo, miyo—miyo koolapa, ni siiso. Ayo, kinnaamini.” Pilato aahiira siiso, “Miyo koolapa, vekeekhai, ‘Kinrowa omwiiriha exeeni

Mulopwan'ola naxariya?" Khimukhanle omunyawaka Owo siiso. Nnari, nnari.

²¹² Munrowa omwiirihha exeeni Yoowo? Mwaahikhale muKristu ooyariwa vasya, ni Erooho Yoowaarya ekhalaka mwa nyuwo, ereheryaka Ekumi anyu, vano muhinaakhelela-ni Yeeyo naanaano va? Khamunrowa onyawa Ela. Khamunrowa ohiya wiiwa Mutthak'ola. Onooruma mpakha nyuwo oruuhha Mutthaka mmurimani mwanyu, wira Yesu Kristu mmosaru nsana, olelo, ni mahiku othene.

²¹³ Vamuthukumanoni ola onooneya voosiis'ula, anookhala va ale ansuwela wira, wira aavonya, ni yaarowa ovenxa matata. Hiyo khanrina opuro wira niihane waltaari, nipuro khanireere osareiwa. Masi mwiire paahi, "Mukivekelele, Munna Branham. Muluku akikhaliherye." Muluku ooreeriheni, kinnoona ntata nanyu. "Eyo ti wii, kinnitthuna, naanaano va. Vaava va kinnitthuna, ohoolo wa Muluku, wira Owo asuwele wira koottheke, ni kinnisuwela wira koottheke. Miyo—miyo kintthuna kimukumihe Owo mmatatani mwaka; miyo kimmuthuna Owo mmurimani mwaka." Nvenxe ntata, mwiire, "Mukivekelele, Munna Branham." Apwiya yooreeriheni. Kinnoona, mwa eyaattelo ela y'atthu va, khino matata miloko mixexe, miloko mithanu avenxiwe va.

Onniitthana olelo, onniitthana olelo,

Muupuwele yeeyo vano, ti Yoowo onitthana. Yesu onniitthana. Ti Yoowo onlavula ni nyuwo.

²¹⁴ Nyuwo murootthekaxa, mpakha murima nyu okhalanxe aya woolipaxa, mpakha muhi, muhinweryanyu nnakhala wiiwa-tho? Emaara emosa, ntoko mwammiravo wala mwaaruusi, nyuwo muhiwa Yeeyo. Mwaahikhalana otthuna wo wira, masi nyuwo khunteerya, nto mulipihaxa murima ni mulipihaxa ithikilelo iyo ni ipurulelo. Orookhalaxa ottaiwene muhinwerya-tho wiiwa Yoowo? Nyuwo mweemenle nipuro... murina... nipuro ntoko Oswald omphwanyaneyawe voosiis'ula, munsuwelaanyu? Ah! Munwerya sayi wira?

Onookhala mukina nihinatthi omaliha ni kivahererya mavekelo? Khula nipuro mpaani mu, mutthu ohivenxale, khwira, "Munna Branham, vamanle anyu ohimya moolumo ookiserya, miyo—miyo kinnoona yeeyo." Mutthu, ota iwo, munvireloni, mmacanelani, khula nipuro, khivancala. Paahi...

²¹⁵ Muluku ooreeriheni, mwamuthiyana. Muluku ooreeriheni, mulopwana, nyuwo. Ni nyuwo. Owo ori mu... Muluku ooreeriheni, muhano. Mutthu mukina-tho? Muluku ooreeriheni, muhano. Muluku ooreeriheni va. Ni Muluku ooreeriheni vo, mwammiravo, mwaaruusi. Ayo, Apwiya yooreeriheni. Ottuli iwo, mulopwana. Ayo.

Vano nrowe nuupuwele yeeyo vano. Kintthuna wira mwiire ela voomaaleleya niipaka nla, *Yesu Onimwiitthana*.

Vano kintthuna paahi mwiire, “Pwiya, mukimorele ikharari miyo, natampi, wala namathepya. Miyo ka mempuru a mukereja, Pwiya, masi miyo—miyo—miyo kinootthunani Nyuwo. Kinootthunani Nyuwo. Mukikhaliherye! Kini—kinimoorumeelani Nyuwo. Miyo kinimmana natiri, naanaano va. Koovenxa ntata naka, wira kinootthunani Nyuwo. Vano Nyuwo nvenxe murim’aka, wira koowaakhelani, nto miyo kinoowaakhelani mmurimani mwaka.” Niipaka-tho eversu ila, munimwiira?

Onniitthana olelo, onitthana olelo,

²¹⁶ Vano nvekele enamuna anyu mmansinyu. Nvekele vano.

Yesu onniitthana . . .

Ti Yoowo onlavula. Mwaha wa yeeyo nvenxale anyu ntata.

. . .vooreera murima onniitthana olelo.

Yesu onniitthana, ni Nsu nooreera,

Mmwiiwe Yoowo . . .

Naanaano va, mmwiiwe Yoowo. Mwiire, “Pwiya, miyo kootheka. Ephome Anyu eri mmatatani mwaka. Miyo ka natampi. Miyo nkinthuna-tho Eyo mwemmo. Nkikhanle orapihaka Eyo; kiheehererya, mwa miyaakha. Nkinrowa wookhottani ntoko Pilato, ni ophavela woovahereryani wa mutthu mukina. Kinootthunani Nyuwo. Murwe mmurimani mwaka, naanaano va, Pwiya. Miyo kinoowaakhelani. Kinniwoonani Nyuwo mweemenle ohoolo waka, ntoko elatarato yeemenle-ene vale; mwaha wo waamini miyo kinneetta kirwaaka okela mwa Nyuwo, kisuwelaka wira Nyuwo munookilevelela. Ni miyo ka . . .Nyuwo munrowa okhala mmurimani mwaka, okhuma va mpakha ohoolo.”

. . .olelo,

Atthu othene avekeleke.

Yesu onniitthana, Owo onniitthana vooreera murima olelo.

²¹⁷ Tithi a Wirimu, mutthaka mwaamukhaani woomala. Nto vano, ithanlelo, ipwaro soopakiwa voosis’ula. Malaikha aathukumana musaala. Erooho Yoowaarya yuulupale va evahaka milipiheryo wira Yesu nlelo mukumii. Owo aari ephattuwelo ya Ekumi Ehinimala. Mahiye khawenrye onvarelela, nnakhala omooroni khowenrye onvarelela Owo. Owo oowela; ootaphuwa omooroni, ootaphuwa mmahiye. Nto Owo omphwanyaneya eriyari ahu, olelo.

Nto iyaaminelo sahu ni miromolelo sihaatthuka aththu ahu anci-ene, Pwiya. Etampi ehaatthuka, masi olelo awo anthuna okhala ootaphuwa. Arimweemela ntoko Pilato, ni, ohiya ophavela onvahererya Owo wa mutthu mukina, awo avenxale matata, “Murwe mmurimani mwaka, Pwiya

Yesu. Miyo nkinrowa-tho woonyawani. Nkinwerya wira-tho. Nyuwo nlelo muri mmatatani mwaka. Miyo koorapiha khurapiha, nave Nyuwo khamukhumme, masi vano miyo kinniwaakhelani. Kinootthunani Nyuwo mw'ekumini mwaka, ni kinniwaakhelani mmakhaleloni mwaka. Pwiya, mukaakhele Momweneni mw'Anyu, mwa olevelela itampi saka, ni mukivahe waamini wira kaamini wira Nyuwo mookaakhela, Tithi." Munivahe. Mwa Nsina na Yesu Kristu, hiyo ninnivekela.

²¹⁸ Nto vano, nirina-ene miru sahu soowuurama, waamini, mwaha wo waamini, "Ni, Muluku, Nyuwo mukikhaliherye okhala naxariya, masi kisuwelaka wira Nyuwo moolaiherya yeeyo 'Ole onrwa wa Miyo, Miyo nkinimurihela ota hata mano. Ni kinonvaha Ekumi Ehinimala, ni kinoomuhihimuxa mahiku ookiserya. Ole onikihimya ohoolo w'atthu, Miyo kinoomuhimya ohoolo w'Atithi Aka ni Malaikha oowaarya. Ole oniiwa," otaphuleliwa w'ekeekhai, wa Yohani Oowaarya 5:24 vo, ti, "ole oniiwa saana, onaakhela Masu Aka. Ole onaakhela Masu Aka, ni onimwaamini Ole okirumme, ookhalana Ekumi ehinimala, nto khonrowa wiitthaniwa Woolamuliwani." Khamunrowa orwa Opwaro wo Olamuliwa ntoko Oswald onrowawe wira. "Masi moovira," ni nlevelelo na mahala, "okhuma mookhwaani khuphwanya Ekumi."

²¹⁹ "Pwiya, nkisuwenle sayi, nkisuwenle mwaha wa xeeni, masi—masi kookupali wira ehiiraneya. Miyo kinnaamini eyo, mmurimani mwaka, ohaamini waka woorowa. Kinoowerya vootaphuwa wiirela 'amen' Masu othene Nyuwo munihimyanu, ni miyo kinnikupali Yaawo naanaano va. Miyo kinnaamini."

²²⁰ Vano ni miru sanyu sowuurama. Nyuwo munaamini yeeyo, nvenxale matata okathi vakhani ovinre, ni mwaha wo waamini munnoona elatarato ya Kristu emphwanyaneya vale, yeeyo yaatthuneya nyuwo okhala-mo, nyuwo muneetta vano mwaha wo waamini, waamini wira itampi sanyu sooleveleliwa. Nto okhuma olelo mpakha ohoolo, nyuwo moolikana wira mwaakhele opatiiso w'oKristu, ni moolikana vano wira mweeteke mwa Kristu. Mwaanitthuna, ntoko onamoona wa Yoowo, onvenxerya matata, wira, "Mwaha wo waamini miyo kinnaamini ni murim'aka wothene"? Muluku ooreeriheni. Ti yooreera. "Miyo vano kinnikupali Yeeyo. Miyo—miyo kinnikupali; khiyaavo ekhanle aka wira." Muluku ooreeriheni. Enkhala wira athu othene mpakha vanweryaaka woona. "Miyo vano kinnikupali."

²²¹ Moone, nyuwo khamuhiyo ooloka, nyuwo khamunakhaleke ooloka, khivanweryaneya okhala ooloka, masi Yesu aakhwenle athu oohiloka. "Kiireke eexeni, Munna Branham?" Mukupali paahi etthu Owo iiralyawe, mukupali paahi etthu Owo owiirenyaweni. Nto vano mwaha wo waamini Yeeyo ni okupali Yeeyo...

Vano, kookupali, pastore, etanki enrowa otthukuliwa. [Munna Neville onira, “Ayo.”—Mol.] Opatiso onrowa okhala woolikana, mwaatthunaka opatisiwa.

Vakhala wira mukupanli itiitulu, “Tithi, Mwaana, Erooho Yoowaarya,” nyuwo vekeekhai mwa...Miyo kinihimya ela ni nlemeliho ni nttittimiho, masi, mwa enamuna aka yo woona, nyuwo khampatisiwe. Nyuwo khampatisiwe, okhala wira khamuttharihenle ele Owo ohimmyawe.

²²² Owo ohimmye wira, “Mwaapatise mwa Nsina n’Atithi, Mwaana, ni Erooho Yoowaarya.” Vakhala wira mwaarina itiitulu iyo muromoleliwaka; Owo khonahimyeke wira, “Murowe mwaromole *itiitulu* iya; murowe mwahimye *masina* ala.” Khenairiweke mBibiliani. Khenairiweke siiso. Waari, opatisa enamuna Yesu ohimmye awe, “Mwa Nsina n’Atithi, Mwaana, ni Erooho Yoowaarya,” okhanle Yesu Kristu.

²²³ Petru, ni ihulelo, ohimmye etthu emosaru, khula murummwa mukina, Ekereja yothene, mpakha Muthukumano woopacerya w’oNicea okathi ekereja Katolika y’oRooma yitthokihale aya, khukupali itiitulu ohiya Nsina. Nyuwo mumpatisiwa mwa makano a oRooma a muromolelo, ahiiso mumpatisiwa mwa Nsina na Yesu Kristu, emosa wala ekina. Eri mmatatani mwanyu, khamukhanle onyawaka Eyo, Eyo eri vo.

Nyuwo mookupali Yeeyo vano. Miyo kinimookohani, okathi na—okathi naorkawu ni napiyaano amphavelasaya nsipo noosuveliwa na khalayi:

Waamini waka onweha wa Nyuwo,
Nyuwo Mwaapwittipwitthi a oKalvario,
Moopoli Muluku;
Vano mukiiwe okathi onlompaka,
Ni mukumihe sootheka saka sothene,
Ni mukihiye okhuma olelo
Kikhale othene Awinyu!

²²⁴ Ohikhale hata mmosa onikhuma mpaani. Voottittimiha-vo vano, nto nrowe ninvenxerye matata Yoowo vano.

Waamini waka onweha wa Nyuwo, (Ni Owo ti Masu.)
Nyuwo Mwaapwittipwitthi a oKalvario,
Moopoli Muluku;
Vano mukiiwe okathi onlompaka,
Mukumihe itampi saka sothene,
O mukihiye okhuma olelo
Kikhale othene...

Othene ni voomalela, Awinyu! Vano kinnivahererya ekumi aka.

²²⁵ Maasi anookhala oolikana muhina mwa minuutu vakhani. Mwaahiweryeke opatisiwa naanaano va, ninoopatisa-tho olelo ohiyu.

Muupuwele yeeyo, oxekuwa wothene, “Mmatatani mwanyu.” Mukumihe. Enamuna emosa paahi mukhanlyanyu wiiraka, onkhala, orapihiwa Mphomeni mwa Yesu Kristu, T’ani. . . Munnona? Ayo, mulopwana. Muupuwele yeeyo vano nuuramihaka muru ahu. Munwehe Yoowo vano.

Okathi ekumi eryaaya muxankiho. . .

²²⁶ Othanla ori mmurimani mwanyu vano. Owo onoophukiwa. Masu t’olikana wira akhomeliwe. Kristu onoophukiwa. Munrowa omwiiriha exeeni Yesu oniihaniwa Kristu?

Nyuwo mukhale Muholeli aka;
Murukunxe epiphi okhale othana,
Muukutthe, maithori,
Muhikihiye nnakhala kikhumelaka
Ottaiwene wa Nyuwo.

Vano niyevihaka mirima sahu wa yeeyo. [Munna Branham oniipa muhina-muhina *Waamini Waka Onweha Wa Nyuwo—Mol.*]

²²⁷ Muupuwele voowiixerya, apatthani. Khino nsina nanyu ti nookiserya ninrowa Muliivuruni. Hiyo nri okathi wa wookiseryani. Vano muupuwele vowiixerya saana. Nyuwo mwa, ookhala mutthu va omukhontte Yoowo?

²²⁸ Muupuwele, khino khenrwa-tho. Pilato khaakhalanne-tho okathi mukina. Owo aahiira voowerya wawe wira oopowe, nave khaawenrye. Yaari mmatatani mwawe. Nto munrowa wiiriha exeeni Masu oottikittheliwa a nihiku nla, aniihaniwa Kristu? 

63-1124M Kimwiirihe Exeeni
Yesu Yoowo Oniihaniwa Kristu?
Branham Tabernacle
Jeffersonville, Indiana wAmerika

EMAKHUWA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org